

DIŽA' GÜEN DAN' BZOJ SAN MARCOS

*Juan ben' bzoa beņe' nis gwdixjue'ede' diža' güen
che Diosen' latje daš*

(Mt. 3:1-12; Lc. 3:1-9, 15-17; Jn. 1:19-28)

¹ Qui goc cate' gwxe xtiža' Jesucristo ben' nac dogualje Xi'in Dios.

² Da' Isaías ben' be' xtiža' Diosen' cani' bzoje' da' nga, žan:

Chselā' to beņe' cuialagüe' laogun' güe'e xtižon',
cont ba zjanita' beņe' yosozenague' chio' cate' šejo'.

³ Beņa' chņe' zižje latje dašen' že':

“Le gonšagüe' yichjlažda'olen' cont gwzenagle che
Xanchon' cate' yide';

le cuejyichj da' malen' chonle cont yichjlažda'olen'
gaquen ca to nez da' ba gosonšagüe'.”

⁴ Ca' goquen', Juan ben' chzoa beņe' nis bžine'
latje dašen' na' gože' beņe' ca' besežag na' cheyalā'
yesyetinjde' xtolā'gaque' na' yesezoe' nis cont nitlao
xtolā'gaque'. ⁵ Zan beņe' za'ac do distritw Judea
na' ciuda Jerusalén bosozenague' che diža' dan'
chyixjue'ede'. Na' cate' gosexoadole' bi da' xiņj
zjanone', Juanna' bzoje' legaque' nis lo' yegw Jordán.

⁶ Xalāna' Juanna' goquen de yiša' xa camello na'
da' bchej lsine' goquen de yid, na' gwdagüe' biše'zo
len šina' beser yixe'. ⁷ Na' gwdixjue'ede' beņe' xtiža'
Diosen', gwne':

—Coža' na' za' za' to bene' zaca'che' ca neda', na' da' nacchgüe' bene' zaca', bi zaca' gona' xmandadoe' lechja' no xele'. ⁸ Neda' ba bzoa' le'e nis, perw ben' za' zan' gone' cont soa Spiritw che Diosen' lo' yichjlažda'olen' nabian' xbab chele.

Jesúsen' gwzoe' nis

(Mt. 3:13-17; Lc. 3:21-22)

⁹ Ca tiempa' Jesúsen' gwze'e lagüe yež Nazaret da' chi' ga mbane distritw Galilea, na' Juanna' bzoe' le' nis lo' yegw Jordán. ¹⁰ Na' šlac chechoj Jesúsen' lo' nisen', Jesúsen' ble'ede' byaljw yaban' gan' zoa Diosen', na' Spiritw che Diosen' betjen jasoan len le', na' ca hora' Spiriton' naquen ca nac ngolbex. ¹¹ Na' gosende' gwne Dios ben' zoa yaba gwne':

—Len' naco' Xi'ina' bene' chacchgüeda', na' chebe chezaque'laže'chgüeda' chio'.

Satanásen' goclažen' co'oyelan' Jesúsen' cont gone' da' mal

(Mt. 4:1-11; Lc. 4:1-13)

¹² Nach Spiritw che Diosen' benen cont la' gwyete Jesúsen' latje daš. ¹³ Na' gwzoe' latje dašen' choa ža ladjo be znia ca'. Na' Satanás dan' chnabia' da' xigüe' ca' goclažen' co'oyelan' le' cont gone' da' mal. Nach beyoža' jasadlen angl che Diosen' le'.

Jesúsen' gwzolao chyixjue'ede' xtiža' Diosen' distritw gan' nzi' Galilea

(Mt. 4:12-17; Lc. 4:14-15)

¹⁴ Beyož gosegüe'e Juanna' ližya, Jesúsen' beze'e beyeje' Galilea gan' jatixjue'ede' diža' güen, gwne' Diosen' nabi'e yichjlaždao' bene' ca' yosozenag che'.

¹⁵ Jesúsen' gwne':

—Ba bžin ža cate' Diosen' nabi'e yichjlaždao' bene' yosozenagüe' che'. Le yetinje xtola'len' na' le šejle' diža' güen che Diosen' da' chyixjue'eda'.

Jesúsen' goxe' tap bene' gw Xen bel šja'aclene' le' txen

(Mt. 4:18-22; Lc. 5:1-11)

¹⁶ Jesúsen' chde' do cho'a nisdao' che Galilean' cate' ble'ede' chope bene' gw Xen bel, Simón na' bene' biše' Andrés. Na' zjanite' chosozale' yixjw dan' chesezende' belen' lo' nisa'. ¹⁷ Na' gož Jesúsen' legaque':

—Le šo'o len neda'. Nacle bene' gw Xen bel na' chbejle belen' lo' nisen', perw na'a gona' cont gaxle bene' yesyechoje' lo da' malen'.

¹⁸ Nach la' bosocua'ante yixjw chen' na' jasa'aclene' le'.

¹⁹ Na' Jesúsen' gwze'e yelate' na' ble'ede' Jacobon' xi'in Zebedeo na' len bene' biše' Juan, zjajo'e lo' barcw chesyeyonšagüe' yixjw čhegaquen'. ²⁰ Na' Jesúsen' lecze goxe' legaque' šja'aclene' le' na' bosocua'ane' Zebedeon' ben' nac xagaque lo' barcon' len bene' ca' chesaclen le', nach ja'aque' len Jesúsen'.

To bene' gwyo'o gwyaze' da' xigüen'

(Lc. 4:31-37)

²¹ Besežine' yež da' nzi' Capernaum, na' ža che Dios Jesúsen' gwyo'e lo' yodao' da' zoa na' na' gwzolagüe' bsd blo'ede'. ²² Bene' ca' že' na' besyebande' can' bsd blo'ede', le can' bzejni'iden' nacbia' nezde' cayanen' nac xbab che Diosen', gague bzejni'ide' can' chosozejni'i ben' chosolo'e

ley dan' bzoj da' Moisés. ²³ Na' lo' yodaon' zoa to be_{ne}' yo'o nyaze' da' xigüen', na' bosye'e gwne':

²⁴ —¿Bixchen' chgoša' chlaže' chio' len neto', Jesús be_{ne}' Nazaret? ¿Zedežiayo'o neto'? Neda' nombi'a le' na' nezda' naco' be_{ne}' laždao' xilaže' juisyw be_{ne}' gwse_{la}' Dios.

²⁵ Nach Jesús_{en}' gože' da' xigüen':

—¡Ššago', bechoj lo' yichjlaždao' benga!

²⁶ Na' da' xigüen' benen cont gwcho_{le} bena', nach chosya'adiachguan bechojen lo' yichjlažda'ogüen'.

²⁷ Yogo' be_{ne}' ca' že' na' besyebande' na' gose' lježe':

—¿Bixen' chac? ¿Bixe da' coben' chlo'e benga? ¡Nacbia' nape' yela' chnabia' na' yela' guac, le da' xigüe' ca' chesonen da' že'!

²⁸ Na' ca' nac dan' ben Jesús_{en}' bedao'nez gos gw_lalje dižan' doxen lagüe yež ca' gan' mbane Galilea.

Jesús_{en}' beyone' taobi'in che Simón Pedro

(Mt. 8:14-15; Lc. 4:38-39)

²⁹ Cate' besyechoje' lo' yodaon', Jesús_{en}' len Jacobo na' len Juan ja'aque' liž Simón na' Andrés.

³⁰ Na' taobi'in che Simón_{na}' die' che'ede' x_{la}; na' gose'e Jesús_{en}':

—Benga die' che'ede'.

³¹ Nach jabiga' Jesús_{en}' na' be_xue' taquen' gw_lise'ne'. Na' la' beyactede', nach bsin_i'e da' gose'ej gosagüe'.

Jesús_{en}' beyone' zan be_{ne}' chese'ede'

(Mt. 8:16-17; Lc. 4:40-41)

³² Cate' ba gw_xoa gwbižen' na' ba gw_xin, jasane' lao Jesús_{en}' zan be_{ne}' chese'ede' na' be_{ne}' zjayo'o zjanyaze' da' xigüen'. ³³ Na' do yež be_{ne}'

besedop besežague' cho'a yo'o gan' zoa Jesúsen'.
³⁴ Na' Jesúsen' beyone' beñe' chese'ede' gwde
 gwdele yižgüe' na' bebeje' zan da' xigüe' da' zjayo'o
 zjanyaz beñe', perw bitw bi'e latje bi yesenan, le
 legaquen zjañezen non' nac le'.

Jesúsen' chyixjue'ede' xtiža' Diosen' Galilea
(Lc. 4:42-44)

³⁵ Šbaļ cate' ñe' nac choljesúsen' gwyase' na'
 gwze'e gwyaje' ga nono nla' na' boļ güiže' Diosen'.

³⁶ Simón na' beñe' lježe' ca' ja'aque' jasyediljue'ne'.

³⁷ Na' cate' besyeželde'ne' gose'ene':

—Yogo'ze beñe' chesyeyiljue' le'.

³⁸ Perw Jesúsen' gože'ne':

—Le šo'o ga yoble ga nac gaļa'ze cont lecze
 šjatixjue'eda' xtiža' Diosen' na', le da'nan' ba
 gwza'a.

³⁹ Can' goc, Jesúsen' gwde' doxen gan' mbane
 Galilea gwdixjue'ede' xtiža' Diosen' to to yodao'
 che neto' beñe' Israel, na' bebeje' da' xigüe' da' yo'o
 nyaz beñe'.

Jesúsen' beyone' to bene' che'ede' lepra
(Mt. 8:1-4; Lc. 5:12-16)

⁴⁰ To beñe' che'ede' yižgüe' dan' nzi' lepra
 jabigue' gan' zoa Jesúsen' na' bzoo xibe' gože'ne':

—Še chaclažo', guac yeca'o yižgüe' dan'
 che'edan'.

⁴¹ Na' Jesúsen' beži'ilaže'de' le' na' beḡue'ne'
 gwne':

—Chaclaža' yeyacdo'. Beyaque.

⁴² Cate' gwne' ca' la' bega'ate yižgüen' na' bey-
 acde'. ⁴³ Nach Jesúsen' besele'ne' liže', bene' man-
 dadw, gože'ne':

44 —Notno yo'o can' ba beyona' le', con gwyej jana' bxoza' cont le'ede' bach beyacdo', na' bnežjw da' cheyala' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' bene' yesenezde' ba beyacdo'.

45 Perw ben' bi bchejde', yogo'ze bene' gože' can' goca'. Da'nan' Jesúsa' bich goc šeje' con ca nla'ze gate'teze yež, san con gwde' do yix'e', na' bia'cze bene' za'ac yogo'ze yež jasene'e le'.

2

Jesúsen' beyone' to bene' bi chda šla'a ni'a ne'e
(Mt. 9:1-8; Lc. 5:17-26)

1 Gwde to chop ža, Jesúsen' beyeje' da' yoble yež dan' nzi' Capernaum, na' bene' Capernaum ca' gosenezde' bežine' to yo'o ga ba gwzoacze'. 2 Na' bedao'nez besežag bene' zan, necach gosezaque' yesenite' lo' yo'ona' ne cho'a yo'on, nach Jesúsen' gwduxjue'ede' xtiža' Diosen' len legaque'. 3 Nach besežin xonj bene' cont jasesane' lao Jesúsen' to bene' xinj bene' bi chda šla'a ni'a ne'e; tap bene' zjano'ene'. 4 Perw bi chac yesežine' gan' zoa Jesúsen' catec chyi. Nach goseque'e tej dan' ncu'a' yichj yo'on na' beseletje' le' na'le to lo cam dao'. 5 Na' cate' Jesúsen' gocbe'ede' can' chesejni-laže'nen', gože' bene' güe'na':

—Xi'ina', ba bezi'xena' xtolon'.

6 Bał bene' chososed chosolo'e ley dan' bzoj da' Moisésen' zjachi'e na', na' gosone' xbab: 7 “¿Bixchen' chna benga ca? le chon cuine' ca Dios. Nono zoa bene' gac yezi'xene' xtola' beňach. Toz Diosen' gac yezi'xenen'.” 8 Perw Jesúsen'

chacbe'eczede' can' nac xbab c̄hegaquen', na' gože' legaque':

—¿Bix̄chen' chza'laže'le ca'? ⁹ Še yapa'ne': "Ba bezi'xena' xtolo'na'", bi nezele še napa' yela' gwnabia' cont yezi'xena' xtole'na', san še yapa'ne': "Gwyas, beyoa' xcamon'", na' nacbia' še napa' yela' guac gac can' gwnian'. ¹⁰ Perw neda' naca' ben' gwsela' Dios golja' benach, gwlo'eda' le'e na'a zoa' yežlio nga napa' yela' gwnabia' cont yezi'xena' xtola' benach.

Nach gože' bene' xinja':

¹¹ —Chapa' le', beyas, beyoa' xcamon' na' beyej ližo'.

¹² La' beyaste bene' xinja' chesena'te bene' ca' nita'na' na' beyoa' xcamen'. Da'nan' yogo' bene' ca' besyebande' na' goso'e yela' choxc̄len c̄he Diosen', gosene':

—Bina' le'echo yela' guac dan' nac ca'.

Jesúsen' goxe' Leví cont gwejlene'ne'
(Mt. 9:9-13; Lc. 5:27-32)

¹³ Da' yoble gwej Jesúsen' cho'a nisdao' na' bene' zan besedobe' gan' zeje' na' bsd blo'ede' legaque' xtiža' Diosen'. ¹⁴ Na' Jesúsen' gwdie' latje gan' chi' Leví xi'in Alfeo chchixjue' impuesto, na' cate' ble'ede' le' na' gože'ne':

—Da len neda'.

Nach gwzoža' Levín' na' gwejlene'ne'.

¹⁵ Na' gwdena' goquen' chi' Jesúsen' liž Levín' na' güe'ej gwdagwlene'ne' txen len zan bene' güeçhixjw na' len yebał bene' güen da' xinj, na' len bene' ca' zjanaque' Jesúsen' txen, le zan bene' zja'ac zjanao' le'. ¹⁶ Perw na' bene' ca' chososed chosolo'e

ley dan' bzoj da' Moisés na' beṇe' fariseo ca' cate' besele'ede' che'ej chagüe' txen len beṇe' ca', gose'e beṇe' ca' zjanaque' Jesúsen' txen:

—¿Nacxechen' ben' chsed chlo'e le'e che'ej chagwlene' txen beṇe' güeḥixjw na' yebaḷ beṇe' güen da' xinj ca'?

¹⁷ Cate' Jesúsen' bende' can' gosene' na' gože' legaque':

—Beṇe' bi chesacšene bi cheseyažjde' beṇe' güen rmed. Beṇe' chesacšende', legaquen' cheseyažjde' beṇe' güen rmed. Gague beṇe' ba zjanaque' beṇe' güen len Diosen' zedeneyoeda' cont yesyetinjde' xtolen', san beṇe' güen da' xinj. Legaquen' zjazaca'lebe' ca beṇe' cheseyažje beṇe' güen rmed.

Gosenabde' Jesúsen' bixchen' beṇe' zjanaque' le' txen bi chesone' gwbas

(Mt. 9:14-17; Lc. 5:33-39)

¹⁸ To ža cate' beṇe' ca' zjanaque' txen len Juanna' na' beṇe' zjanaque' txen len beṇe' fariseo ca' gosezoe' gwbas, baḷ beṇe' jasa'aque' jaseṇabde' Jesúsen':

—Beṇe' ca' zjanaque' txen len Juanna' na' beṇe' ca' zjanaque' txen len beṇe' fariseo ca' chesone' gwbas, na' beṇe' ca' zjanaque' txen len le' bi chesone' gwbas. ¿Bixchen'?

¹⁹ Na' Jesúsen' gože' legaque':

—¿Guaque yesezoa gwbas beṇe' chaxe' to ga chac yela' güešagna' šlac ben' bšagnan' zotalene' legaque'? Še zoa ben' bšagnan', bi gac yesone' gwbas. ²⁰ Perw žin ža cate' bich zoe' len legaque', cana'ch yesone' gwbas. Na' ca'czen' naquen len neda' na' len beṇe' ca' zjanaque' neda' txen.

21 'Nono zoa be_{ne}' yode'e to lache'e_{xo}' na' yezoen' to lache' cobe, le lache' coben' ye_{ben}' cate' c_{hi}ben' na' šon' lache' golen', na' gan' žon'na' gacchen da' xen. 22 Neca zoa be_{ne}' chgue'e vino cobe lo' bzod yide'e_{xo}', le vino coben' c_hšon' yide'e_{xon}' na' chbiayi' vinon' len yida'. San chesegue'e vino coben' lo' yid cobe cont bibi gaquen.

Be_{ne}' ca' zjanaque' Jesúsen' txen chesalje' dao ža che Dios

(Mt. 12:1-8; Lc. 6:1-5)

23 To ža che Dios Jesúsen' gwdie' to ga nyaž trigw, na' be_{ne}' ca' zjanaque' le' txen gosezo-lagüe' chesalje' dao che trigon' šlac gosedie' gan' nyaženna'. 24 Nach be_{ne}' fariseon' gose'e le':

—Gwna'šc žbixchen' cheson be_{ne}' ca' zjanaque' le' txen žin da' bi cheya_{la}' yesone' ža che Dios?

25 Na' Jesúsen' gože' legaque':

—žBina' gwlable can' ben da' rey David to ža cate' le' na' be_{ne}' lježe' ca' gosedone'? 26 Gwyo'o Davin' ga nac liž Dios cate' da' Abiatar goque' b_xoz bla, na' gwdagüe' yetextil da' nac che Dios da' bi chac gagw be_{ne}' bi nac b_xoz, na' lecze bnežjue' che be_{ne}' zja'ac len le'.

27 Lecze gož Jesúsen' legaque':

—Diosen' gwleje' to ža cate' bi yeson be_{na}chen' žin cont gaclenen be_{na}ch, gague gwleje' be_{na}chen' cont yesonxene' ža chen'. 28 Da'nan' naquen lo' na' n_{ia}' bi da' nac güen goncho lente cate' nac ža che Dios, neda' naca' ben' gwsela' Diosen' golja' be_{na}ch.

3

Jesúsen' beyone' to bene' nxo'on šla'a taque'
(Mt. 12:9-14; Lc. 6:6-11)

¹ Yeto ža che Dios Jesúsen' gwyo'e da' yoble to lo' yodao' che neto' bene' Israel na' ca hora' ba chi' to bene' nxo'on šla'a taque'. ² Na' bene' ca' že' lo' yodao' na' chosogüia chesene'e Jesúsen' še yeyone' bena' žan' nac ža che Dios cont de da' yosode'ede' yesagüe' xya che'. ³ Nach Jesúsen' gože' ben' nxo'on taquen':

—Gwzoža' na' gwzecha nga.

⁴ Nach gwñabde' bene' ca' yezica'chle:

—¿Bi da' cheyała' goncho ža che Dios? ¿Goncho da' güen, še goncho da' mal? ¿Cheyała' yoslacho bene', še cheyała' gotchone'?

Perw na' legaque' gosenite' šižize. ⁵ Nach Jesúsen' gwñe'e legaque', bže'e can' gosone' xbab, na' lecze gocyaše'laže'de' dan' bi gosejle'e che', nach gože' ben':

—Bli naon'.

Na' blien', na' taquen' beyaquen binlo. ⁶ Nach besyežaš bene' fariseo ca' na' gosezolagüe' chosoxi'e len bene' ca' zjada' Herodes naquen' yesone' yesote' Jesúsen'.

Zan bene' nita' cho'a nisdaon'

⁷ Nach Jesúsen' gwyeye' cho'a nisdaon' len bene' ca' zjanaque' le' txen, na' zan bene' Galilea ja'ac len le'. ⁸ Na' zan bene' za'aque' Judea, na' Jerusalén, na' Idumea, na' yešla'a yegw Jordán, na' gan' mbane Tiro na' Sidón goside' bedesene'e le' cate' goseñezde' yela' guac da' chonen'. ⁹ Da'nan'

Jesúsen' gože' bene' ca' zjanaque' le' txen yesey-iljue' to barcw dao' gan' cuie' cont bi yosochi bene' ca' zjanžaga' le', ¹⁰ le bene' zan ba beyone', na' bene' ca' ne' chese'ede' chosožiga' lježe' nac gac yesoxe'ne'. ¹¹ Na' bene' ca' zjajo'o zjanyaz da' xigüen' cate' chesele'ede' Jesúsen' chosozoa xibe' lagüen' na' da' xigüe' ca' chososya'an chese'en le':

—Len' naco' dogualje Xi'in Dios.

¹² Perw Jesúsen' gwdile' legaquen na' bene' mandadw bi yesenan no nac le'.

Jesúsen' gwchie' bene' šižinw ca' gosaque' txen len le'

(Mt. 10:1-4; Lc. 6:12-16)

¹³ Beyoža' Jesúsen' gwloe' to lo ya'a na' goxe' bal bene' goclaže' šja'aclene' le', nach gosa'aque' ja'aque' gan' zoen'. ¹⁴ Nach gwleje' šižinw bene' yesenita' len le', cont sele' legaque' šjasedixjue'ede' xtižen'. ¹⁵ Na' bnežjue' legaque' yela' guac cont yesyeyone' bene' güe' na' yela' gwnabia' cont yesyebeje' da' xigüe' da' yo'o nyaz bene'. ¹⁶ Šižinw bene' quin' gosac: Simón ben' lecze gože'ne' Pedro; ¹⁷ Jacobo len bene' biše' Juan bene' ca' zjanac xi'in Zebedeo, na' bsi'e legaque' Boanerges, zeje diža' bene' zjanac ca' yi' gwzio' cate' chašjw chtinen; ¹⁸ nach Andrés, na' Felipe, na' Bartolomé, na' Mateo, na' Tomás, na' Jacobo xi'in Alfeo, na' Tadeo, na' Simón ben' gwde'e bene' ca' zjanzi' cananista, ¹⁹ na' Judas Iscariote ben' gwdechle bdie' Jesúsen' lo na' bene' ca' chesegue'ede' le'.

Gosene' Jesúsen' bebeje' da' xigüe' len yela' guac che Beelzebú

(Mt. 12:22-32; Lc. 11:14-23; 12:10)

Beyoža' Jesúsen' len beṇe' ca' zjanaque' le' txen goso'e lo' yo'o gan' zoe' ca' hora', ²⁰ na' da' yoble besežagchgua beṇe', neca goc yese'ej yesagw Jesúsen' len beṇe' ca' zjanaque' le' txen. ²¹ Na' cate' goseneze biše' ljež Jesúsen', ja'aque' cont yesyeche'ene', le gosene' chactonte'.

²² Nach beṇe' ca' bososed bosolo'ede' ley dan' bzoj da' Moisés gosa'aque' Jerusalén na' ja'aque' distritw Galilea gan' chsed chlo'e Jesúsen' na' gose'e beṇe' ca' že'na':

—Benga yo'o nyaze' Beelzebú dan' chnabia' da' xigüe' ca', na' Beelzebún' chaclenen le' cont chebeje' da' xigüe' zjajo'o zjanyaz beṇe'.

²³ Nach Jesúsen' goxe' beṇe' ca' na' bsd blo'ede'ne' gwne':

—¿Nac gon Satanás dan' chnabia' da' xigüe' ca' yebejen lecze da' xigüe'? ²⁴ Še to gobiern choje' chop šon cuenle na' yeyoža' yesedile legacze', gobierna' bi sibi'e. ²⁵ Na' še beṇe' že' toz yo'o yesechoje' chople na' yesedile legacze', gague sša yesenite' txen. ²⁶ Na' še Satanásen' len da' xigüe' čhen yesechojen chople na' yesedilen, lecze bi sibian', san na' yeyož yedon.

²⁷ 'Nono gac šo'e lo' yo'o che to beṇe' gual na' que'e bi da' de che' še cbi zgua'tec gwčeje' beṇe' gual na', lete gone' ca' nach gac que'e bi da' de che'.

²⁸ 'Da' li žia' le'e, yogo' da' xinj da' chon beṇač na' yogo' diža' bya' da' yesene', Diosen' yezi'xene' čhen še yesyetinjde'. ²⁹ Perw note'teze beṇe' ne' yela' ya' čhe Spiritw čhe Dios, gwbat yezi'xen Diosen' čhe', san de doła' čhe' toli tocaṇe.

³⁰ Gwne' ca' dan' gosene' che' yo'o nyaze' da' xigüe'.

Xna' Jesúsen' na' bene' biše' gosaxe'ne'
(Mt. 12:46-50; Lc. 8:19-21)

³¹ Na' bžin xna' Jesúsen' len bene' biše', na' gosenite' chyo'ole gosaxe' le'. ³² Na' bene' ca' zjanita' cuit Jesúsen' gose'ene':

—Xna'o len bene' bišo' ca' zjanite' chyo'o na' chesyeyiljue' le'.

³³ Nach Jesúsen' gože' legaque':

—¿Nezele non' nac xna'a na' no zjanac biše' lježa'?

³⁴ Nach gwne'e bene' ca' zjachi' cuite'na', na' gwne':

—Bene' quin' zjanac xna'a na' zjanaque' biše' lježa'. ³⁵ Le note'teze bene' chone' da' chna'laže' Dios, bena' nac bene' biša', bene' zana', lecze naque' xna'a.

4

Jempl che bene' goz trigo
(Mt. 13:1-9; Lc. 8:4-8)

¹ Yeto ža yoble gwzolao Jesúsen' chsed chlo'ede' cho'a nesdaon', na' besežagchgua bene' zan juisyw gan' chi'ena'. Na' da' besežagchgua bene' zan, benten byen gwyo'o Jesúsen' to lo' barcw dao' da' chda' lo' nesdaon' cho'a yo bižen' na' gwchi'e lo'enna', na' yogo' bene' ca' gosenite' cho'a nesdaon' ga nac yo biž. ² Nach da' zan da' bsed blo'ede' legaque' len jempl da' bi'e. Na' bzejni'ide' legaque', gwne':

³ —Le gwzenag da' nga: To bene' güen žin jeze' trigw. ⁴ Na' šlac zeje' chose' trigon', late' bin che trigw dan' chazen' jasechazen chanez nach be ca'

žia xil be chaš le'e yaba gosagwban'. ⁵ Yelaten' jasechazen ga nac lo yej, ga bibi yotec zoa, na' da' nga byob blan' le bi jasechazen ga nac sitjw. ⁶ Perw cate' bla' gwbiža' na' bzeyen len na' gwbižen, le gague yo'otec loenna' sitjon'. ⁷ Yelaten' jasechazen ga nac lo yag yeše', na' yag yešen' gosecha'on na' bosololen' len, na' bibi gosebjan. ⁸ Perw na' yelaten' jasechazen ga nac yo šagüe'. Da' nga beselan' na' gosecha'on na' leca güen gosebjan, balen gosebjan do šichoa güeje to ton, balen gayon, na' yebalen do to gayoa.

⁹ Na' gože' legaque':

—Le'e žia nagle da' chene, le gwzenag xtiža'na'.

Bichen' bzejni'ide' bene' len jempl

(Mt. 13:10-17; Lc. 8:9-10)

¹⁰ Gwdena' cate' ba besyeya'ac bene' zan ca', bene' ca' zjanita' gała'ze len le' na' len bene' šižiñw ca' zjanaque' le' txen, gosenabde' le' bi zejen jempl dan' bi'en. ¹¹ Na' gože' legaque':

—Nono na' neze can' nac yela' gwnabia' che Diosen', perw ba chone' cont le'e chejnilaže'lene' nezelen. Na' bene' bi chesaclaže' yesejnilaže' Diosen', choe'lengaca'ne' xtižen' len jempl. ¹² Chona' ca' cont yesele'ede' can' chonan' na' bitw yesacbe'ede' bi zejen, na' cont yesende' xtižan' na' bi yesejni'iden', na' neca yesyetenjde', neca yezi'xen Diosen' xtolen'.

Jesúsen' bzejni'ide' bi zejen jempl che ben' ben goza'

(Mt. 13:18-23; Lc. 8:11-15)

¹³ Nach gože' legaque':

—¿Bi chejni'ile jempl nga? ¿Nacxe gac šejni'ile jempl yoble da' güe'lena' le'e? ¹⁴ Ben' ben goza' naque' ca ben' choe' xtiža' Diosa'. ¹⁵ Na' baḷ beṇe' zjanaque' ca biṇ dan' beselažo' chanez, le chosozenague' cate' chas chlalje xtiža' Diosen', na' ca cheyoža' la' chžinte Satanásen' dan' chnabia' da' xigüe' ca' na' chebejen xtiža' Diosen' dan' ba yo'o yichjlažda'ogüen'. ¹⁶ Yebaḷ beṇe' zjanaque' ca biṇ dan' beselažo' ga nac lo yej na' bi ben loen. Legaque' chesyebede' chosozenague' xtiža' Diosen', ¹⁷ perw šložga chesezibi'e, na' cate' chesac bi da' mal čegaque' o bichle chesone beṇe' legaque' neče da' chosozenague' xtiža' Diozen', la' chesebejyichjten'. ¹⁸ Na' yebaḷe' zjanaque' ca biṇ dan' besego'onen ga nac lo yag yeše'. Chosozenague' xtiža' Diosen', ¹⁹ na' šlac zjambane' chesyelaḷ chesyěžejde', na' da' chesaclaže' yeseni'e chziye'en legaque' na' chesezelaže' yogo'ze da' de yesata' če'. Yogo' da' qui bi choen' latje yega'an xtiža' Diosen' lo' yichjlažda'ogüen' na' da'nan' bi chesejnilaže' le' ca cheyaḷa'. ²⁰ Perw na' nita' baḷ beṇe' chosozenague' xtiža' Diosa' na' chesejnilaže' le' do yichj do laže', beṇe' qui zjazaca'lebde' ca biṇ dan' beselažo' lo yo šagüe'. Baḷe' zjanaque' ca biṇ dan' gosebjan šichoa güeje to ton, na' yebaḷe' ca da' ca' bexoen' gayon, o ca no da' ca' bexoen' to gayoa güeje to ton.

Jempl che yi' dan' chguala'cho
(Lc. 8:16-18)

²¹ Lecze gože' legaque':

—Cate' chguala'cho to yi' ¿gw dosa'chon to caj o gwzoachon xan cam? Bi choncho ca', san chguala'cho

yin' na' chzoachon sibe cont gwseñin'. ²² Na' da' ngaše' chia' neda' na'a, lenna' gwlo'elaon, na' da' nono na' neze chia', žin ža yesenezden'. ²³ Le'e žia nagle da' chene, le gwzenag xtižan'.

²⁴ Lecze gože' legaue':

—Le gwzenag da' quingan' da' chzejni'ida' le'e. Le con can' chonle len len, can' gon Diosen' len le'e. Na' gonchcze' cont soachle mbalaz da' chzenagle che'. ²⁵ Le še chzenagle xtižen' gwzejni'ichde' le'e, perw na' še bi chzenaglen, da' daon' ba nezele yeyanlaže'len.

Jempl che biñ dan' chlan' na' chcha'on

²⁶ Lecze gwna Jesúsen':

—Yela' gwnabia' che Diosen' zaca'leben ca dan' chac cate' to bene' chaze' bite'teze biñ lo yo. ²⁷ Chjaytase' na' chebane' cheyase', chde ža yel, na' chla' dan' gozen' na' chcha'on, perw le' bi neзде' naquen' chac. ²⁸ Le to gualazze yežlio nan' chonen len, zgua'tec chla' lbe'edagüen', nach chlan' dao, na' cheyoža' chbian da' cheyala' cuian. ²⁹ Na' cate' ba gol dan' chbianna' na' chja'aque' chjasyexi'en, le ba bžin cho'a gwlap.

Jempl che biñ che xomdas

(Mr. 13:31-32; Lc. 13:18-19)

³⁰ Nach lecze gwna Jesúsen':

—Gonchcho xbab bi ca da' zaca'lebe yela' gwnabia' che Diosen' na' güe'cha' jempl cont nezele šanch bene' yosozenag che' cont nabi'e yiçhlažda'ogaque'. ³¹ Naquen ca to biñ che xomdas da' chyaž lo yo. Len chnabia' nac da' dao' len biñ ca' chazcho lo yežlion'. ³² Perw cate' baçh nyažen, chcha'on na' chaquen da' xench lao yiçe' cuan ca',

na' da' xenchgua chac xol che xozenna', na' lente byiñ dao' ca' chesyenzi'laže'ba' lo xozenna'.

Jesúsen bgone' žin jempl

(Mt. 13:34-35)

³³ Can' blo'e Jesúsen' xtiža' Diosen' yogo' ni'a, bi'e zan jempl ca' che ben' goza' na' che biñ ca', con ga zelao goc gosejni'ide'. ³⁴ Bitwbi bzejni'ide' legaque' sin ca' be'e jempl, nach cate' bich nita' bene' zan ca', bzejni'ide' bene' ca' zjanaque' le' txen bi zejen yogo' da' ca'.

Jesúsen' bebecžie' be' bdono' len nisdao'

(Mt. 8:23-27; Lc. 8:22-25)

³⁵ Leze lo žana' cate' gwxiñ, Jesúsen' gože' bene' ca' zjanaque' le' txen:

—Le šo'o laga'cho yešla'a nisdaon'.

³⁶ Nach bosyocua'ane' yezica'chle bene' ca' že' gan' ba bsed blo'ede' na' gosa'aque' lo' barcw daon' gan' ba yo'ocze Jesúsen'. Na' yebal bene' lecze ja'aclene' legaque' len yeto chop barcw dao'.

³⁷ Na' gwzolao gwyechjchgua to be' bdono' na' nisdaon' leze chas chatan', na' gwzolao cheyož nis lo' barcon'. ³⁸ Jesúsen' ba chtase' xante barcon' to lo xcogue' caten' goc ca'. Na' bosyosbane' le' gose'ene':

—¡Maestro! ¿Bibi de chza'lažon' še ba gwdebe nisdaon' chio'?

³⁹ Nach gwyas Jesúsen' na' gwdile' be' bdonon' na' gože' nisdaon':

—¡Šižize! ¡Šižize!

Na' bebeži be' bdonon' na' beyataži nisdaon'.

⁴⁰ Nach Jesúsen' gože' bene' ca' zjanaque' le' txen:

—¿Bix_čhen' chžebtecle? ¿Nacxe_čhen' bi chej_le'le
chia'?

⁴¹ Legaque' besežebchgüe' na' gose' lježe':

—¿Noxe benga? lente be' bdono' na' len nisdaon'
chosozenaguen čhe da' že'.

5

Bene' Gadara yo'o nyaze' da' xigüe'

(Mt. 8:28-34; Lc. 8:26-39)

¹ Besežine' šla'a nisdaon' gan' mbane Gadara,
² na' cate' bechoj Jesúsen' lo' barcon' to bene' yo'o
nyaz da' xigüen' bchoje' lo' capsantw na' jašague'
le'. ³ Bena' ba zoacze' capsantw na'le na' nono
chzoe goxe' le', ne len gden ca gosezoede' le'. ⁴ Da'
zan ni'a bosočheje' ni'a ne'e gden, perw bia'cze
gwčhoguen', con bzoxx btinen', na' nono gwzoe le'.
⁵ Yogo' ža yogo' yel gwde' bosya'adie' do lo ya'a
na' do ladjo ba ca' na' tža tža chone' zi' cuine' len
yej. ⁶ Na' cate' ble'ede' Jesúsen' zito' gwyejsese'
jazoa xibe' lagüen', ⁷ na' da' xigüen' benen cont
bosya'adie' gože' le':

—¿Bix_čhen' chgoša' chlaže' čhio' len neda', Jesús?
Naco' dogualje Xi'in Dios bene' nape la'zelagüe yela'
chnabia' xen. Neče Dios chņeyoeda' le' bi gwsaco'
neda'.

⁸ Da' xigüen' benen cont gwna ben' ca' dan' gož
Jesúsen' len:

—Da' xigüe', bsan benga.

⁹ Na' gwñabe Jesúsen' len:

—¿Bi lio'?

Na' boži'in xtižen':

—Legión lia', le nac zanto'.

10 Na' goseneyoen Jesúsa' bi yeselen' zito' cate' yesyežašen' yichjlaždao' ben'. 11 Na' gala'ze lo ya'ana' chesaš zan coš chesagwba'. 12 Nach da' xigüen' goseneyoen le':

—Gwseła' neto' gan' nita' coš ca' na' beñ latje šjajo'oto' lo' yichjlažda'oban'.

13 Nach Jesúsen' bnežjue' latje, na' besyechoj da' xigüen' lo' yichjlaždao' bena' na' jasyeyo'on yichjlaždao' coš ca'. Nac ca do chop mil cošen'. Na' besyeyetjses coš ca' le'e ya'a gan' nita'ban' na' jaselažo'ba' lo' nisdao' ga gosatba' gose'ejba' nis.

14 Nach beñe' ca' chosoyoe' cošen' bosyoxonje' jasyeyeže' beñe' lagüe yež len beñe' chaš yixe' can' goca'. Na' ja'ac beñe' jasene'e bixen' goc. 15 Cate' besežine' gan' zoa Jesúsen' besele'ede' ben' ba gwyo'o gwyaz da' xigüen', na' na'a ba chi'e nyaz xalane' na' ba bezoa yichjlažda'ogüen' binlo. Na' besežebe'. 16 Na' beñe' ca' besele'ede' can' goquen' goso'e diža' che dan' goc len ben' gwyo'o gwyaz da' xigüen', lez ca' dan' goc len coš ca'. 17 Nach gosezo-lagüe' gosata'yoede' Jesúsen' yeze'e lažgaquen'.

18 Na' cate' beyo'o Jesúsen' lo' barcon' ben' ba gwyo'o gwyaz da' xigüen' gota'yoede' Jesúsen' šejlene' le'. 19 Perw Jesúsen' bi be'e latje, san gože' le':

—Beyej ližo' na' jayež beñe' lo' yo'o chio' na' no beñe' migw chio' yogo' da' güen da' ba ben Xancho Diosen' len le' na' catec ba beyaše' beži'ilaže'de' le'.

20 Na' beza' ben' na' gwzolagüe' cho'e diža' yež ca' gan' mbane distritw Decápolis yogo' can' ben Jesúsen' len le', na' yogo' beñe' gosene xtižen' besyebande'.

Bi' no'ol che Jairo, na' no'ol ben' gwdane' xa Jesúsen'

(Mt. 9:18-26; Lc. 8:40-56)

²¹ Cate' bežin Jesúsen' cho'a nesdaon' zeze'e lo' barcw daon' dan' zeza' šla'a nesdaon', bene' zan ja'aque' gan' bežinen', na' Jesúsen' bega'ane' cho'a nisdao' na'ze. ²² Nach bžin to ben' nac bene' gwnabia' che yodao' che yežna', lie' Jairo. Cate' ble'ede' Jesúsen' bzoa xibe' lagüen' ²³ na' gota'yoechgüede'ne' gože'ne':

—Xi'ina' no'ole ba chatbe'. Benšca goclen yo'o xoa taco' yichjbe' cont yeyaquebe' na' bi gatbe'.

²⁴ Nach Jesúsen' gwyejlene' le'. Na' bene' zan ja'acch, na' bosochichgüe' le'. ²⁵ Ladjo bene' ca' len to no'ol che'ede', ba goc šižinw iz chzoe' gwbao'. ²⁶ Ba bžaglaochgüe' jen cuine' rmed len zan bene' güen rmed ca', na' ba benditje' yogo' xmechue' da' de, perw bitwbi gwxi'czen, san chyała'len. ²⁷ Cate' bende' cheso'e xtiža' Jesúsen', no'olna' gwdie' ladjo bene' ca' na' bžine' cože'le Jesúsen' na' gwdane' xen'. ²⁸ Le bene' xbab, gwne': "Con še ba gwdana' xen' nach yeyactecza'." ²⁹ Na' da' li cate' gwdane' xen' la' gwlezte gwbao' dan' zoen', na' no'olen' gocbe'ede' ba bega'a yižgüe' chen'. ³⁰ Na' Jesúsen' la' gocbe'etede' to bene' ba beyacde' len yela' guac chen', nach gwyechje' gwne'e bene' ca' nita' cože'le, na' gwñabde' legaque':

—¿Non' gwdan xan'?

³¹ Nach bene' ca' zjanaque' Jesúsen' txen gose'ene':

—Ba ble'eczedo' ca chosochie' le', ¿bixchen' chñabo' non' gwdan xaon'?

³² Perw Jesúsen' chne'e nile na'le cont le'ede' non' gwdan xen'. ³³ Nach no'olen' nezde' can' ba goc che' na' do chaž chžebe' gwyeje' jazoa xibe' lagüen' na' gože'ne' yogo' da' li. ³⁴ Na' Jesúsen' gože'ne':

—Xi'ina', ba beyacdo' dan' chejnilažo' neda'. Beyej binlo, na' bich bi gacdo' len yižgüe' chion'.

³⁵ Ne' choe'te Jesúsen' dižan' ca' cate' besežin bene' gosa'ac liž xan yodaon', na' gosi'e xa bi' no'ol daon':

—Ba got bi' chion', ¿bixchen' choncho' zed Maestro nga?

³⁶ Perw Jesúsen' bi bene' cuent dan' chesena bene' ca', na' gože' xan yodaon':

—Bitw žebo', con gwyejle' chia'.

³⁷ Na' bi bi'e latje šja'aclen bene' zan le' gan' xoa bi' no'olen', san Pedro, Jacobo na' Juan bene' biše' Jacobo, bene' ca'ze ja'aclen le'. ³⁸ Na' cate' besežine' liž xan yodaon', ble'ede' ba chi' žaš chesosye'e chesebeže'. ³⁹ Nach gwyo'e na' gože' legaque':

—¿Bixchen' mbecle žaš chbežle? Bi no'ol daon' biṇa' gatbe', san chtasben'.

⁴⁰ Perw bosoxiže' gosonle' che'. Nach Jesúsen' bešaše' yogo'lóle', na' gwche'e xaxna'be' na' bene' ca' zja'aclen le' na'ze na' goso'e len le' gan' de bi' no'ol daon'. ⁴¹ Na' beṅue' taca'ben' na' gože'be':

—Talita, cumi —zeje diža': Bi' no'ole, chapa' le' beban na' beyas.

⁴² Nach bi' no'ol daon' la' beyastebe' na' goc beza'be', le šižinw izegueben'. Na' bene' ca' besele'e leca besyežejde' can' goca'. ⁴³ Perw Jesúsen' gože' legaque' nono yese'e ca', na' gože' legaque' yeso'e bi' no'ol daon' da' gagwbe'.

6

*Jesúsen' bežine' distritw gan' chi'yež Nazaret
(Mt. 13:53-58; Lc. 4:16-30)*

¹ Na' beza' Jesúsen' na' bežine' laže', na' beṇe' ca' zjanaque' le' txen ja'aclene' le'. ² Na' cate' bžin ža che Dios, Jesúsen' gwzolaküe' bsed blo'ede' lo' yodaon'. Na' beṇe' zan beṇe' gosende' xtižen' besyebande' na' gosene':

—¿Nacxe chaquen' cho'e diža' ca'? ¿Bi yela' sinan' nežde'? na' ¿nacxečen' chac chone' yela' guac ca'? ³ Benga chonšagüe' yag na' naque' xi'in María. Nombia'chwne' na' beṇe' biše' Jacobo, José, Judas na' Simón, na' lecze beṇe' zane' ca' nite' lažcho nga.

Na' da' zjanombi'ene' nan' bi gosaclaže' yesejle'e che'. ⁴ Nach Jesúsen' gože' legaque':

—Yogo'ze beṇe' chesonxene' beṇe' choe' xtiža' Diosen', perw beṇe' gualaž che', beṇe' biše' lježe' na' beṇe' lo' yo'o che' bi chosozenague' che'.

⁵ Na' ne to yela' guac ca' goc gone' na', lete gwxoā taquen' yichj to chop beṇe' güe' na' beyone' legaque'. ⁶ Na' bebande' dan' bi gosejle' beṇe' che'. Na' gwdechle gwda Jesúsen' bsed blo'ede' to to yež dao' ca' nita' gała'ze.

*Jesúsen' gwsele' beṇe' ca' zjanaque' le' txen
jasedixjue'ede' xtiža' Diosen'
(Mt. 10:5-15; Lc. 9:1-6)*

⁷ Na' goxe' beṇe' šižinw ca' na' gwsele' chop güeje' to to yež, na' bnežjue'ne' yela' gwnabia' cont goc besyebeje' da' xigüe' lo' yichjlaždao' beṇe'. ⁸ Na' cate' za' yesa'aque' gože' legaque' bibi yesože' chanez, ne bzod, ne yetextil, ne mechw, con yesože' to xis da' yosočiše'. ⁹ Na' yosoleje' yel

perw bi yesoe' yeto xcamise'. ¹⁰ Na' lecze gože' legaue':

—Cate' žinle to liž beņe', na'ze yega'anle šlac zoale lagüe yeža', cate'ch yeza'le yeža' cana'ch yeza'le latja'. ¹¹ Na' še zoa ga bi yosolebe' le'e neca yosozenague' chele, cate' yeza'le na' le cuibe ni'alen' yo bište cont nacbia' malen' chesone' bi chosozenague' xtiža' Diosen'. Da' li žia' le'e cate' žinža gac juisyw beņe' ca' bi yosolebe' le'e yesacche' castigw clal ca beņe' Sodoma na' beņe' Gomorra.

¹² Nach gosa'aque', na' goseyixjue'ede' cheyała' yesyetiņje xtoła' beņachen'. ¹³ Leze besyebeje' da' xigüe' da' yo'o nyaz beņe', na' zan beņe' güe' goseyebe'ne' set na' besyeyacde'.

Gosote' Juan ben' bzoe' beņe' nis

(Mt. 14:1-12; Lc. 9:7-9)

¹⁴ Na' ca nac rey Herodes, gwneзде' can' chesone', le yogo'ze beņe' gosende' can' ben Jesúsēn'. Na' Herodesen' gwne':

—Juan ben' bzoe' beņe' nisen' ba beban ladjo beņe' guat ca'. Da'nān' chaque' chone' yela' guac.

¹⁵ Yebaļe beņe' gosene':

—Naque' ben' be' xtiža' Diosen' cani', ben' le Elías.

Na' yebaļe' gosene':

—Naque' con to beņe' choe' xtiža' Dios ca beņe' ca' gosoe' xtiža' Diosen' cani'te.

¹⁶ Cate' Herodesen' bende' dižan' nac ca' na' gwne':

—Bengan' Juan ben' gwchogbi'an gosechogue' yene', na' na'a ba bebane' ladjo beņe' guaten'.

17-18 Le Herodesen' beque'e Herodías na' gwzoa-lene' le' goque' xo'ole' la'czla' Herodíasna' naque' xo'ole Felipe biše'na'. Na' Juanna' gože' Herodesen':

—Bi cheyala' soalen no'ol che beṇe' bišon'.

Da'nan' Herodesen' gwčhogbi'en gosezene' Juanna' na' bosočeje'ne' len gden lo' yo'o ližya gan' gosegü'ene'.

19 Can' goc Herodíasna' bgue'ede' Juanna' na' goclaže' gote'ne', perw bi goc. 20 Le Herodesen' gwnezde' Juanna' naque' to beṇe' chon da' zej to licha na' to beṇe' yo'o lo na' Dios, nachen' Herodesen' bžebe' Juanna' na' bi be'e latje bi gone Herodíasen' le'. Na' la'czla' bi gwyejni'iteque Herodesen' dan' bšalj Juanna', con bebede' bzenague' che'. 21 Perw Herodíasen' beyiljwlaže' nac bene' cate' ben Herodesen' lni goła' ža le', bsiṇi'e xše' da' gwdagü'e len beṇe' gwnabia' che' ca' na' no xan soldadw ca' na' nochle beṇe' blao že' distritw Galilean'. 22 Bi' no'ol che Herodíasen' gwyo'obe' bya'abe' gan' gosagü'e xšen' na' beca'a Herodesen' can' bya'aben', lez ca' ben' gosagw len le' xšen'. Na' reyna' gože' bi' no'ola':

—Gwnabe neda' con da' žan čhio' na' goṇan'.

23 Na' lecze gože'be':

—Diosen' naque' testigw čhia' goṇa' le' con da' nabdo'nda', la' gašjo yež ca' gan' mbanda' chnabi'a.

24 Na' bechojbe' na' gožbe' xṇa'ben':

—¿Bi nabda'ne'?

Na' le' gože'be':

—Gwnab yičhj Juan ben' chzoe' beṇe' nis.

25 Na' la' beyo'otebe' gan' chi' reyna' na' gožbe'ne':

—Che'nda' netecna'a gono' neda' to lo' platw yichj Juan ben' chzoa beṇe' nis.

²⁶ Na' ne late'ze bi gwyazlaže' reyna' gone' can' gož no'ol güegon' le', perw bachle gwne' lao beṇe' ca' jasa'ac lnin' Diosen' naque' testigw che' gwnežjue'be' bite'teze nabebe' le', da'nan' bi bžone' gac dan' gwṇabebe' le'. ²⁷ Nach la' gwseła'te reyna' to soldadw na' gože'ne' šjaxi'e yichj Juanna'. ²⁸ Na' gwyej soldadon' lo' yo'o ližyan' na' jachogue' yen Juanna', na' bžie' yichje' to lo' platw jasanen' bnežjuen' bi' no'ola', na' bi' nga bnežjwben' xna'be'.

²⁹ Cate' goseneze beṇe' ca' zjanaque' txen len Juanna', jasexi'e cuerp chen' cont bosocuaše'ne'.

Jesúsen' bguagüe' gayo' mil beṇe'

(Mt. 14:13-21; Lc. 9:10-17; Jn. 6:1-14)

³⁰ Beyoža' postlw ca' besyežague' len Jesúsen' na' gose'ene' bica' da' ba gosone' na' da' ba bosolo'ede'.

³¹ Na' Jesúsen' gože'ne':

—Le da, le šo'o ga nac lchojiže' yezi'laže'cho late'.

Gwne' ca' le chep chetj chac beṇe', neca chac latje yesagüe'. ³² Nach Jesúsen' len postlw che' ca' gosa'aque' ja'aque' legacze' to lo' barcw, ja'aque' ga nac lchojiže'. ³³ Perw zan beṇe' besele'ede' gosa'aque' na' besyeyombi'e Jesúsen', na' zan yež beṇe' ca' bosoxonjsese' na' byobch besežine' ca' Jesúsen'. ³⁴ Na' cate' Jesúsen' bchoje' lo' barcon' ble'ede' ba besežag beṇe' zan na' beyaše' beži'ilaže'de' legaque', le nite' ca' nita' no xila' be nono de gwyoeba'. Nach gwzolaogüe' bsd blo'ede' legaque'. ³⁵ Cate' ba zoa xin, beṇe' ca' zjanaque' le' txen gose'ene':

—Ba zoa x̄in, na' latj gan' zoacho nga naquen latj daš. ³⁶ Na' besela' bene' quinga cont šja'aque' ga že' bene' do ranšw na' do yež dao' ca' dan' nyechj mbi'i šjasexi'e da' yesagüe', le bibi de yesagüe'.

³⁷ Na' Jesúsen' gože'ne':

—Le'e le güe'e da' yesagüe'.

Na' legaque' gose'ene':

—Bi de laxjwto' che chop gayoa ža žin cont šjaxi'to' da' güe'to' legaque' yesagüe'.

³⁸ Jesúsen' gože'ne':

—¿Gaca' yetextilen' de chele? Le šja'ac le šjana'.

Cate' gosenезде' na' gose'ene':

—De gayo' yetextil na' yechop bel ya'a.

³⁹ Nach gože' bene' ca' yesebi'e to xonj güeje' lo yixyen'. ⁴⁰ Na' gosebe' to gayoa güeje' na' yebale' šiyon güeje'. ⁴¹ Nach Jesúsen' gwxi'e yetextil ca' gayo' na' bel ya'an chope, na' gwne'e le'e yaba bi'e yela' choxc̄len che Dios na' bzojje' yetextilen' bi'en bene' ca' zjanaque' le' txen cont goseyisen' len bene' ca'. Leze gwdis̄e' bel ya'a ca' chop lao yogo'lol bene' ca'. ⁴² Na' yogüe' gosagüen' na' goseljde'. ⁴³ Beyoža' bososše'e yešičiñw žome yetextil bixjw na' len late' güeje bel da' bega'an. ⁴⁴ Na' bene' ca' gosagw yetextilen' gosaque' gayo' mil bene' byo, bi cuent no'ol ca' len bidao'.

Jesúsen' gwze'e lo nis

(Mt. 14:22-27; Jn. 6:16-21)

⁴⁵ Gwdena' Jesúsen' bene' byen besyeyo'o bene' ca' zjanaque' le' txen lo' barcon' cont yesyela'gaze'gue' nisdaon' na' yesežine' Betsaida, šlac le' za' chesele' bene' ca' žena' ližgaque'. ⁴⁶ Na' cate' beyož bzede' bene' ca' diža', gwyeje' lo ya'an

bol güiže' Dios. ⁴⁷ Na' ca nac barcon', cate' goc chol ba zejen gachol nisdaon', na' toze Jesúsén' ñe' zie' ga nac yo biž. ⁴⁸ Na' ble'ede' bi chac yosyose'en binlo, le ben' chechjen clele na' bi choen' latje sa' barcon'. Na' šbal beyetj Jesúsén' ya'ana' na' gwze'e lo nisen' ba zej gale' gan' zja'aquen', na' ba zoa teze' gan' zjaya'aquen' ⁴⁹ cate' besele'ede' le' chze'e lo nisen'. Na' gosacde' še da' chda chelen'. Na' bososye'e. ⁵⁰ Le yogüe' besele'ede'ne' na' besežebe'. Perw le' la' bol güižte' legaque', gože'ne':

—Le gonchach laže'le; nedan', bitw žeble.

⁵¹ Nach gwyo'e lo' barcw gan' zjaya'ac bene' ca', nach gwche'ži ben'. Na' legaque' leca besyebande' na' besyežejde', ⁵² le bi gosejni'ide' dan' bene' yela' guac len yetextil ca', na' bina' yesejnilaže' le'.

*Jesúsén' beyone' bene' güe' ca' že' Genesaret
(Mt. 14:34-36)*

⁵³ Na' goselague' nisdaon' na' besežine' yežlio gan' nzi' Genesaret, na' bosochėje' barcon' cho'a nisdaon'. ⁵⁴ Na' cate' beyož besyechoje' lo' barcon' bene' ca' la' besyeyombia'te' Jesúsén'. ⁵⁵ Na' ja'acsese' doxen gan' mbane Genesaret, na' do lo cam dao' zjanxoe' bene' güe' ca' jasesane'ne' gan' zjanezde' zoa Jesúsén'. ⁵⁶ Na' gate'teze gwyej Jesúsén', do yixe', do yež, con goseyixjue' bene' güe' ca' do chanez na' goseneyoede' Jesúsén' gwnežjue' latje yesoxe' la'ch late'ze xni'a xen', na' yogo' bene' gosoxen' besyeyacde'.

7

Dan' chchoj lo' laždao' benačhen' chonen cont laždagüen' bi naquen xilaže' len Diosen'

(Mt. 15:1-20)

¹ Nach bene' fariseo ca' na' len bene' ca' bososed bosolo'e dan' bzoj da' Moisés gosá'aque' Jerusalénna' na' ja'aque' gan' zoa Jesúsén'. ² Na' besele'ede' bał bene' ca' zjanaque' Jesúsén' txen con gosagüe' neca bosyone'e zan ni'a can' chesacde' cheyala' yesone', na' da'nán' gosezi'diže' legaque'. ³ (Le bene' fariseo ca' na' yogo' bene' Israel gualaž cheto' ca' chesonxene' costumbr ca' da' bosyocua'anlen da' xozxta'oto' ca' neto' bi yesagüe' še biña' yosyone'e zan ni'a. ⁴ Na' cate' yesyežine' lagüe ya'a, bi yesagüe' še biña' yosyone'e, na' da' zanch costumbr da' zjana'ogüe', ca no yeseyibe' xiga' ga chese'eje' nis, no yeso' xguague, no yeso' ya na' no xcame'.) ⁵ Nach bene' fariseo ca' na' bene' ca' bososed bosolo'ede' dan' bzoj da' Moisésén' gosenabde' le':

—¿Bixchen' bi cheson bene' ca' zjanaque' le' txen can' goson bene' gol ca'? san con chesagüe' sin chi chosyone'e zan ni'a.

⁶ Jesúsén' gože' legaque':

—Chonle cayanen' bzoj da' Isaíasén' che le'e nacle bene' gwxiye' gan' bzoje', žan':
Bene' qui chesonxene' neda' len diža' cho'a,
perw bi chesonxene' neda' len lažda'ogaque'.

⁷ Bibi zejen dan' chesonxene' neda',
le dan' chososed chosolo'eden' naquen da'
chnalaže' benačhze.

⁸ Bi chonle ca chnalaže' Dios, san na'ole can' ža benačhen' cheyala' gonle, chyible no yeso'

xguague, no xiga' ga che'ejle nis, na' da' zanch da' chonle.

⁹ Qui gožch Jesúsen' legaque':

—Chbejyichjle da' non Diosen' mandadw gonle cont na'ole costumbr che beñach. ¹⁰ Da' Moisésen' gwne': “Le gap bala'an xaxna'le”, na' “Note'teze' še chžia chnite' xaxne'e, cheya'a' gate'.” ¹¹ Perw le'e žale to bene' guac ye'e xaxne'e: “Bibi de gona' gaclena' le'e, le yogo' da' de chia' naquen Corbán” (zeje diža', ba bnezjuen' lo na' Dios). ¹² Na' žale cate' to bene' že' ba naquen lo na' Diosen' nach bich cheya'a' gaclen xaxne'e. ¹³ Dan' žale ca' chzoale ca'ale dan' ža Diosen' na' con chonxenle costumbr gole che da' xozxta'ole ca'. Na' da' zanch dan' nac ca' chonle.

¹⁴ Da' yoble gox Jesúsen' bene' ca', na' gože' legaque':

—Yogo'le le gwzenag chia', na' le šejni'i. ¹⁵ Bite'teze da' ye'ej gagw beñachen', bi nacho len chonen cont lažda'ogüe' bi naquen xilaže' len Diosen'. Dan' chchoj lo' lažda'ogüen', lenna' chonen cont lažda'ogüe' bi naquen xilaže' len Diosen'. ¹⁶ Le'e žia nagle da' chene, le gwzenag xtiža'na'.

¹⁷ Cate' bsan Jesúsen' bich bšaljlene' bene' ca' na' beyo'e lo' yo'o, nach bene' ca' zjanaque' le' t xen gosenabde' le' bi zejen dan' gože' legaque'. ¹⁸ Na' Jesúsen' gože' legaque':

—¿Lecze len le'e bi chejni'ile? ¿Bi chejni'ile gague da' ye'ej gagw beñachen' chonen cont lažda'ogüe' bi naquen xilaže' len Diosen'? ¹⁹ Le da' che'ej chagw beñachen' gague cho'on lo' lažda'ogüen', san lo' li'en cho'on, na' chžin hor cheden.

Na' da' gwne' ca' zeje diža' bite'teze yela' guagw nacczen xilaže'. ²⁰ Na' ľecze gwne':

—Xbab da' yo'o ľo' yichjlaždao' beňachen', lenňa' chonen cont lažda'ogaque' bi zjanaquen xilaže' len Diosen'. ²¹ Le ľo' yichjlaždao' beňachen' chchoj xbab mal ca da' žan yesone' da' quinga: yesata'lene' no'ole bi nac xo'olgaque' o beňe' byo bi nac beňe' čhegaque', gwzoa xtogaque', yesote' beňe', ²² yesone' gwban, yesezelaže' gata' čhegaque' da' de čhe beňe' yoble, yesone' da' mal, yeseziye'e beňe', yesone' bichle da' nac da' yela' zto', yesacxi'ede' beňe', yeseňeye'e čhe beňe', yesaque' beňe' ya'laže', yesone' xbab da' bi zaca'. ²³ Yogo' da' mal qui chesechojen ľo' laždao' beňach na' chonen cont bi nac lažda'ogaque' xilaže' len Diosen'.

*To no'ol zito' gwyejnilaže' Jesúsen'
(Mt. 15:21-28)*

²⁴ Na' beza' Jesúsen' na' gwyeje' distritw gan' mbane ciuda Tiro na' ciuda Sidón. Na' gwyo'e to ľo' yo'o na' goclaže' nono ņeze, perw bi goc gone' cont bi gosenezde'. ²⁵ Cate ľa' gwñezete xňa' to bi' no'ole bi' yo'o nyazbe' da' xigüen', na' gwyeje' na' bzoa xibe' xňi'a Jesúsen'. ²⁶ No'olen' goque' beňe' zito', no'ole Sirofencia. Gwyeje' gwnabde' Jesúsen' yebeje' da' xigüe' yo'o nyaz bi' no'ol čhen'. ²⁷ Na' Jesúsen' gože'ne':

—Yogo'ze beňe' zgua'tec chnežjue' da' chagw xi'ine'. Bi naquen güen yeque'e yela' guagw čhe xi'ine' na' gwnežjuen' yesagw beco' ca'.

²⁸ Na' no'olen' gože'ne':

—Leczedo' can' gwnaon' Xana', perw lecze guaque gagw beco' be chi' xan mes bla'a da' chlažo' lo yo.

²⁹ Nach Jesúsen' gože'ne':

—Nacczen can' gwnaon', guac yeyejo', ba bechoj da' xigüen' yo'o nyaz bi' no'ol chion'.

³⁰ Cate' bežin ližen' ble'ede' de bi' no'ol daon' to lo cam, na' ba bechoj da' xigüen' yo'o nyazbe'.

Jesúsen' beyone' to bene' cuež, bene' lecze bi goc nie'

³¹ Jesúsen' bezse'e gan' mbane Tiro na' gwdie' gan' nzi' Sidón na' yež ca' gan' mbane Decápolis, na' bežine' cho'a nisdao' che Galilea. ³² Na' jasane' to bene' byo bene' cuež na' bi goc nie', na' gosenabe' xoa na' Jesúsen' yichje'. ³³ Nach Jesúsen' gwche'ene' late' lchojiže' ga nono bene' nita', na' bde xbene' lo' nague' na' bži'en xene' na' gwdane' ložen'. ³⁴ Nach gwne'e le'e yaba, bebande', na' gwne':

—¡Efata! —zeje diža': ¡Byaljo!

³⁵ Nach nag bena' besyeyaljon na' goc bende', na' lecze beyac ložen' na' goc gwne' binlo. ³⁶ Na' Jesúsen' gože' bene' ca' nono yese'e ca', perw la'czla' gože' legaque' ca', nachle goso'e diža' can' goca'.

³⁷ Na' leca besyebande', na' gosene':

—Yogon' chone' binlo; chacte chone' cont chesyeyene bene' cuež ca' na' bene' ca' bi chac yesene' chesyenie'.

8

*Jesúsen' cho'e da' chagw tap mil bene'
(Mt. 15:32-39)*

¹ Ca tiempa' besežagchgua bene' zan na' bibi de yesagüe'. Nach Jesúsen' goxe' bene' ca' gwleje' cont zjanaque' txen len le' na' gože' legaque':

² —Cheyaše'da' bene' qui, le ba goc šone ža zjanite' nga len neda' na' bibi de yesagüe'. ³ Še yesela'ne' ližgaque' na' bina' yesagüe', chanez yesego'one' yesečholde', le bale' za'aque' zito'.

⁴ Nach bene' ca' zjanaque' le' txen gose'ene':

—¿Nacxe goncho güe'chone' da' yesagüe' latje nga ga nono bene' nita'?

⁵ Na' Jesúsen' gwñabde' legaque':

—¿Gaca' yetextilen' de chele?

Na' legaque' gose'ene':

—Gažen.

⁶ Nach bene' mandadw yesebe' yogo'lol ben' nitan' lo yo, na' gwxi'e da' gaž yetextil ca' na' be'e yela' choxcen che Dios, nach bzoxjen' bnežjuen' bene' ca' zjanaque' le' txen na' legaque' goseyisen' che yogo'lol bene' nita' na'. ⁷ Leze zjano'e to chop bel ya'a, na' Jesúsen' be'e yela' choxcen che Diosen' che bel ya'a ca' na' leze goseyisen' che yogo'lol bene'. ⁸ Na' yogüe' gosagüe' na' goseljde'. Gwdena' bososše'e yegaže žome len late' güeje yela' guagw da' bega'an. ⁹ Bene' ca' gosagon' zjanaque' ca do tap mil bene'. Cate' ba besyedagüe', Jesúsen' gože' legaque': —“Nayežagcho”, ¹⁰ na' gwyo'e lo' barcon' len bene' ca' zjanaque' le' txen na' gwyeje' do gan' mbane yež da' nzi' Dalmanuta.

*Bene' fariseo ca' gosaclače' gon Jesúsen' to yela' guac da' yesele'ede' le'e yaba
(Mt. 16:1-4; Lc. 12:54-56)*

11 Na' bene' fariseo ca' gosezolagüe' chesedildiže' len Jesúsén'. Na' da' gosacłaze' yesagüe' xya che' nach gosenabde'ne' gone' to yela' guac da' yesele'ede' le'e yaba cont yesenezde' še da' licze Diosa' gwsele' le'. 12 Jesúsén' bebanchgüede' na' gwne':

—Ba ble'ele chona' yela' guac. ¿Bixchen' chñable to yela' guac da' le'ele cont nezele še Diosen' gwsele' neda'? Da' li žia' le'e, bitwbi gona' da' le'ele.

13 Nach bcua'ane' legaque' na' beyo'e lo' barcon' beze'e beyeje' yešla'a nesdaon'.

Levadura che bene' fariseo ca'
(Mt. 16:5-12)

14 Bene' ca' zjanaque' Jesúsén' txen gosanlıže' yeso'e da' yesagüe', na' totec yetextil zjano'e lo' barcon'. 15 Na' Jesúsén' gože' legaque':

—Le gon xbab, le gwsaca' len levadura che bene' fariseo ca' na' len levadura che Herodes.

16 Nach gosenabe lježe' bixchen' gwne' ca', na' gose' lježe':

—Gwne' ca' le gague bi yetextil checho den'.

17 Jesúsén' gocbe'ede' xbab dan' chesone' na' gože'ne':

—¿Bixchen' chacžejlaže'le da' bibi yetextil de? ¿Biña' šejni'ile, neca chacbe'ele? ¿Nac chač lažda'olen' bi chejle'le? 18 ¿Bi chle'ele len yejlaole, neca chenele len nagle? ¿Bi chjayze'ele? 19 Gwdisa' gayo' yetextil na' goquen che gayo' mil bene', na' ¿bi chjayze'ele yebale žome goc da' becho'onen da' botoble?

Na' legaque' gosene':

—Šižinw žome becho'onen da' botobto'.

20 —¿Chixe caten' gwdisa' gaže yetextilen' lao tap mil be_{ne}'? ¿Yebale žome gwža'te dan' botoblen'?

Na' gosene':

—Gaže žomen'.

21 Nach gože' lega_{que}':

—¿Bi_{na}' šejni'iczele na'a cho'a diža' che dan' chososed chosolo'e be_{ne}' fariseo ca'?

Jesúsen' beyone' to be_{ne}' lchol be_{ne}' Betsaida

22 Gwdechle besežine' Betsaida na' jasesane' to be_{ne}' lchol lao Jesúsen', na' gosata'yoede' le' yeyone' le'. 23 Na' be_{xue}' taca' be_{ne}' lchola' na' gwleje'ne' yež. Nach gwdebe' xene' yejlagüen' na' gw_{xoa} taquen' yichje' na' gw_{nabde}'ne' še chle'ede' late'. 24 Be_{ne}' lchola' gw_{ne}'e na' gwne':

—Chle'eda' be_{ne}', na' chle'eda'ne' ca yag, perw chesa'aque'.

25 Nach Jesúsen' be_{xoa} taque' yejlagüen' da' yoble, na' gw_{na}'ya_{ne}' ben' na' beyaque', bele'etede' yogo' binlo. 26 Nach Jesúsen' besele' le' liže', gože'ne':

—Bi yeyo'o lagüe yežen', neca no yo'o da' nga.

Pedron' gwne' Jesúsen' naque' Cristo ben' gwlej Diosen' cont nabi'e

(Mt. 16:13-20; Lc. 9:18-21)

27 Gwdena' gwyej Jesúsen' len be_{ne}' ca' zjanaque' le' txen yež dao' ca' zjachi' do ga mbane ciuda da' nzi' Cesarea de Filipino. Na' chanez gw_{nabde}' be_{ne}' ca' zja'aclen le':

—¿Bi chesena be_{ne}'? ¿Non' naca' neda'?

28 Lega_{que}' gose'ene':

—Bale' chesene' naco' Juan ben' bzoa bene' nis, yebale' chesene' naco' Elías, na' yebale' chesene' naco' yeto bene' be' xtiža' Dios cani'.

²⁹ Na' gwnabde' legaque':

—¿Chixe le'e? ¿no žale naca'?

Pedron' gože' le':

—Len' naco' Cristo ben' gwlej Diosen' cont nabi'o.

³⁰ Nach Jesúsén' gože' legaque' nono yese'e ca'.

Jesúsén' gwdixjue'ede' gate'

(Mt. 16:21-28; Lc. 9:22-27)

³¹ Na' gwzolao Jesúsén' bzejni'ide' legaque' can' gac chen', gože'ne':

—Da' zan da' saca'zi'a neda' naca' ben' gwsela' Diosen' golja' benačh. Na' bene' blao ca' chesen-
abia' nación chechon' na' bxož gwnabia' ca' na' bene' ca' chososed chosolo'e dan' bzoj da' Moisés bi yesele'ede' neda' güen da' bi chesejle'e chia', na' yesote' neda', perw gacch šone ža yebana' ladjo bene' guat ca'.

³² Da' nga gwnen' zaca'laon. Na' Pedron' gwče'e Jesúsén' ga nac lchojiže' na' gwzolagüe' chdile' le' dan' gwne' ca'. ³³ Perw Jesúsén' gwyechje' na' gwne'e bene' ca' zjanaque' le' txen, na' gwdile' Pedron', gože'ne':

—¡Gwcuase ca'ale Satanás! Bi nsa'o xbab che Diosen' san nsa'o xbab che benačh.

³⁴ Nach Jesúsén' goxe' bene' ca' zjanaque' le' txen na' yezica'chle bene' na' gože'ne':

—Note'teze bene' še chaclaže' gaque' neda' txen, cheyała' chojyichj cuine', la'czla' saca'zi'e, na' gone' can' nia' neda'. ³⁵ Note'teze bene' chacde'

gone' cont bi saca'zi'e o cont nono yesot le', be-
nan' cuiayi', na' note'teze bene' chzanlaže' cuine'
saca'zi'e o gate' ne chia' neda' o neche xtiža'
Diosen', ba de yela' mban che' toli tocaṇe. ³⁶ ¿Bixe
zejenna' to bene' nabi'e doxen yežlion' na' cuiaye'e
bi gata' yela' mban che' toli tocaṇe? ³⁷ Le bi
zoa nacle gon beṇachen' chixjue' cont gata' yela'
mban che' toli tocaṇe. ³⁸ Bene' ca' že' ṇa'a bi
chesejnilaže' Diosen' na' chesonchgüe' da' xinj.
Na' note'teze bene' še cheto'ede' par ye'e lježe'
chejnilaže' neda', na' še cheto'ede' par gwzenague'
xtižan', lecze ca' neda' yeto'eda' che' par ṇia' naque'
neda' txen, neda' naca' ben' gwsela' Dios golja'
beṇach. Yeto'eda' che' cate' yida' da' yoble nsa'a
yela' zaca' juisyw che Xa' Diosen' na' nchia' bene'
ca' zjanac angl che'.

9

¹ Lecze gož Jesúsen' legaque':

—Da' li žia' le'e, ballle nita'le nga ṇa'a bina' gatle
cate' žin ža le'ele Diosen' gwlo'e yela' guac xen
chen' can' chnabi'en'.

Bša' Jesúsen' ca goque'
(Mt. 17:1-13; Lc. 9:28-36)

² Gwde xop ža, Jesúsen' gwche'e Pedro, Jacobo
na' Juan na' ja'aque' to lo ya'a sibe, na' nono nochle
ja'ac len legaque'. Na' nite' besele'ede' bža' ca goc
Jesúsen'. ³ Xalane' goquen da' šiš xila', gocten ca da'
chactite; la' chibcho lache' yežlio nga bi yechojen
gaquen šiš xila' catequen' goc xalanan'. ⁴ Na' con-
cze besele'ede' da' Elías na' da' Moisés chosošalje'
len Jesúsen'. ⁵ Nach Pedron' gože' Jesúsen':

—Maestro, ¡leca güenna' zoacho nga! Gonto' šone ranšw, to chio', to che Moisés, na' yeto che Elías.

⁶ Le bene' ca' zja'aclen Jesús'en' besežebchgüe', na' Pedroa' bi chacbe'ede' bin' že'. ⁷ Nach gwche' to bejw gan' niten' gwyechjen legaque', na' lo' bejon' gosende' gwna Diosen':

—Bengan' Xi'ina' bene' chacda'; le gwzenag che'.

⁸ Na' cate' gosen'e cue'ej cuiten' notno be-sele'ede', san toze Jesús'en' zie'.

⁹ Na' šlac chesyeyetje' lo ya'an, Jesús'en' gože' legaque' notno yesi'e ca nac dan' besele'eden'. Gože'ne':

—Cate'ch ba bebana' ladjo bene' guat ca', nedan' naca' ben' gwsela' Dios golja' beṇačh, cana' güe'le diža' chen.

¹⁰ Da'nan' gosezoe' šize, nono gose'e ca', perw na' gosenabe lježe' bi zejen dan' gwne' yebane' ladjo bene' guat ca'. ¹¹ Nach gose'e Jesús'en':

—Bene' ca' chososed chosolo'e dan' bzoj da' Moisés chososedde' neto' chesene' zgua'tec da' Elías ben' gwzoa cani' cheyała' yide' da' yoble cate' za' yedenabia' ben' sela' Diosen'. ¿Bixchen' chesene' ca'?

¹² Na' boži'e xtižen':

—Da' liczen' zgua'tec Elíasna' yide' na' yeyo'e xneze yogo'loł da' de yežlio nga. ¿Nezele bin' ža gan' nyoj Xtiža' Diosen' chia' neda' naca' ben' gwsela' Dios golja' beṇačh? Žan saca'zi'a na' bene' zan bi yesejnilaže' neda'. ¹³ Na' žia' le'e, Elías ba bide' na' gosonde' le' con ca gosaclaže', can' nyoj le'e Xtiža' Diosen' žan can' cheyała' gac che'.

Jesúsen' beyone' to bi' yo'o nyazbe' da' xigüe'
(Mt. 17:14-21; Lc. 9:37-43)

¹⁴ Gwdena' besyežine' gan' nita' yezica'chle beṇe' ca' zjanaque' Jesúsen' txen, na' besele'ede' beṇe' zan zjanita' zjanyechjde' legaque', na' len beṇe' ca' chososed chosolo'ede' dan' bzoj da' Moisés chesediḏiže' len legaque'. ¹⁵ Na' cate' beṇe' ca' besele'ede' Jesúsen', yogüe' besyežejde' na' ja'acsese' bosoguape' le' tiox. ¹⁶ Nach gwṇabde' legaque':

—¿Bin' chdiḏiža'le len beṇe' ca'?

¹⁷ Na' to beṇe' nchixe beṇe' ca' boži'e xtižen', gwne':

—Maestro, zedesana' bi' chia' nga, yo'o nyazbe' da' xigüe' na' benen cont bi' chac ṇebe'. ¹⁸ Gate'teze chdabe' chzenen lebe' na' chcho'onen lebe' lo yo, na' chbia bžina' cho'abe' na' chagwxej laybe'. Na' ca' zej chedo fuerz chebe'. Na' ba gwṇaba' lao beṇe' qui zjanaque' le' txen yesyebeje' da' xigüe' yo'o nyazbe', perw bitw gosaque'.

¹⁹ Na' Jesúsen' gože' beṇe' ca' že'na':

—¡Le'e beṇe' bi' chejnilaže'! ¿Šna chyažjen soalena' le'e cont šejnilaže'le? ¿Batca' zelao ṇa'lagua' le'e? Le yedesambe' nga.

²⁰ Na' jasesane'be', na' cate' da' xigüen' ble'en Jesúsen', benen gwyazbe' šon, na' gwbiḁbe' lo yo, chbiḁ chtolbe' na' chbia bžina' cho'abe'. ²¹ Nach Jesúsen' gwṇabde' xaben':

—¿Bal iz ba goc chache' ca'?

Na' xaben' gwne':

—Cate' nache' bida'ote gwzolao chache' ca'.

²² Na' zan ṇi'a da' xigüen' chzalan' lebe' lo yi' na' lo

nis cont goten lebe'. Da'nan' še guac yeyono'be', beyaše'sque neto' na' beyombe'.

²³ Jesúsen' gože'ne':

—Cheyała' šejnilažo' neda', le yogo' da' chzelaže' beṇe' chesejnilaže' neda' chaquen.

²⁴ Nach xaben' gwne' zižje:

—¿Chejnilaža' le', goclen neda' šejnilaže'cha'!

²⁵ Na' cate' Jesúsen' ble'ede' chesežagchgua beṇe', gwdile' da' xigüen' gožen':

—Da' xigüe', le' chono' cont bi' nga bi chenebe' na' bi chac nebe', neda' žia' yechojo'. Bsan bi' nga, na' bich yeyo'o yichjlažda'oben'.

²⁶ Na' da' xigüen' benen ga bosya'abe' na' benen ga gwyazbe' ca yeto šon, nach bechojen. Na' bin' bega'anbe' ca bi' guat, na' zan beṇe' gosene' gotben'. ²⁷ Perw Jesúsen' beṇe' taca'ben' cont beyasbe', nach gwzechabe'.

²⁸ Nach cate' Jesúsen' gwyo'e to lo' yo'o, beṇe' ca' zjanaque' le' txen gosebeje' le' ca to lchojiže' na' gosenabde' le':

—¿Bixchen' bi' goc neto' yebejto' da' xigüen'?

²⁹ Na' gože'ne':

—Cont yechoj da' xigüen' nac ca' cheyała' gonle gwbas na' soatezle yoł güižle Dios.

Da'yoble Jesúsen' gwne' gate'

(Mt. 17:22-23; Lc. 9:43-45)

³⁰ Cate' besyeya'aque' na', besyedia' distritw Galilea. Na' Jesúsen' goclaže' nono yeseneze, ³¹ le chzejni'ide' beṇe' ca' zjanaque' le' txen, che'e legaque':

—Nedan' naca' ben' gwsela' Dios golja' be_nach, yosodie' neda' lo na' be_ne' yesote'nda', perw yeyon ža yebana' ladjo be_ne' guat ca'.

³² Perw bi gosejni'ide' bin' gože' lega_que', na' besežebe' yese_nabde'ne'.

Gosedildiže' gosene' noen' nac be_ne' blaoch
(Mt. 18:1-5; Lc. 9:46-48)

³³ Na' besežine' ciuda da' nzi' Capernaum, na' cate' besežine' yo'o gan' zoa Jesúsen' gw_nabde' lega_que':

—¿Bixchen' chdildiža'le chanez?

³⁴ Perw con gosenite' šižize, le chanezan' gosedildiže' gosene' noen' nac be_ne' blaoch.

³⁵ Nach Jesúsen' gwchi'e na' goxe' be_ne' šižinw ca' zjana_que' le' txen, na' gože' lega_que':

—Še no le'e chaclaže'le gacle be_ne' žialao, cheya_la' gonle xbab bibi zaca'teclé, na' cheya_la' gon cuinle ca' xmos yogo' be_ne' lježle.

³⁶ Nach be_xue' to bidao' na' bzeche'be' gachol lega_que', na' gw_lene'be' na' gože' lega_que':

³⁷ —Note'teze be_ne' chone' güen len to bidao' ca' bi' nga ne_che da' chejnilaže' neda', choncze' güen len neda'; na' noteze' chon güen len neda', choncze' güen len Dios ben' gwsela' neda'.

Be_ne' bi chon chio' contr; txencza' chone' chio'
(Mt. 10:42; Lc. 9:49-50)

³⁸ Nach Juanna' gože'ne':

—Maestro, bežagto' to be_ne' cho'e lao' na' chebeje' da' xigüe' da' yo'o nyaz be_ne', na' bžonto' gone' ca', le bi chone' chio' txen.

³⁹ Na' Jesúsen' gwne':

—Bi gwžonle gone' ca', le gague zoa to bene' gone' yela' guac cho'e lan', yeyoža' ne' yela' ya' chia'. ⁴⁰ Le bene' bi chone' chio' contr, txencza' chone' chio'. ⁴¹ Chnia' le'e to da' zejen, note'teze bene' gone' le'e la' to xiga'ze nis da' ye'ejle neche chejnilaže' neda' na' neche nezde' le'e nacle txen len neda', Diosen' gone' cont soacze' mbalaz da' ba goclene' le'e.

Bitw co'yela'cho bene' gone' da' xinj
(Mt. 18:6-9; Lc. 17:1-2)

⁴² Note'teze bene' chon cont lažo' to bene' za' gwzomagüe' chejnilaže' neda' gone' da' xinj, yejni'acle yosocheje' yene' to yiše xen na' yosozale'ne' lo' nisdaon' clcl ca da' gone' cont lažo' bene' yoble gone' da' xinjen'. ⁴³ Na' še yena'len' chonen cont gonle da' xinj, cheyala' cuejyichjle da' malen' chonle. Yejni'a bibi na'le zoa clcl ca gonle da' xinjen' len len. Na' yejni'a šjayzoale len Diosen' toli tocanē bi zoa šla'a taca'le clcl ca yeyejle lo' yi' gabil dan' bi cheyol chenit nya' cuerp chelen'. ⁴⁴ Na' gabilen' neca chesat bzogan', neca cheyol yin'. ⁴⁵ Na' še ni'alen' chonen ga gonle da' xinj, lecze cheyala' cuejyichjle da' malen' chonle. Yejni'a bibi ni'alen' zoa clcl ca gonle da' xinjen' len len. Na' yejni'a šjayzoale len Diosen' toli tocanē bi zoa šla'a ni'alen', clcl ca yeyejle lo' yi' gabil dan' bi cheyol chenit nya' cuerp chelen'. ⁴⁶ Na' gabilen' bzoga' ca' bi chesatba', neca cheyol yin'. ⁴⁷ Na' še yejlaolen' chonen cont gonle da' xinj, cheyala' cuejyichle da' malen' chonlen'. Yejni'a bibi yejlaolen' žia clcl ca gonle da' xinjen' len len. Na' yejni'a šjayzoale len Diosen' toli tocanē zoa šla'aze yejlaole clcl ca yežinle lo' yi' gabilen' žia chop

la'a yejlaolen'. ⁴⁸ Ca nac gabilen', bi chesat bzogan', nēca cheyol yin'.

⁴⁹ 'Le dan' chyi chzaca'le yežlio nga chzejni'in le'e cont bi yeyeje lo yi' gabil. Na' da' chyi chzaca'le zaca'leben ca zede' da' cheyala' chixe' yezj yogo' ni'a cate' chjasesane' yezj lao Diosen'.

⁵⁰ Na' zeden' naquen güen, perw še bich bi zxi' naquen, ¿nacxe goncho cont yeyaquen zxi' da' yoble? Na' le'e cheyala' gwyo gwčhejlaže'le dan' chyi chzaca'le na' cheyala' soale binlo tole yetole, na' še soale ca', zaca'leble ca to yela' guagw da' yo'o zede'.

10

Jesúsen' bzejni'ide' bi cheyala' yela'acho len no'ol checho

(Mt. 19:1-12; Lc. 16:18)

¹ Jesúsen' beze'e Capernaum na' gwyejche' gan' mbane distritw Judean' na' yešla'a yegw Jordánna'. Na' da' yoble besežag beñe' zan gan' zoen' na' lecze da' yoble bsed blo'ede' legaque' con can' choncze'. ² Nach bal beñe' fariseo ca' ja'aque' gan' zoa Jesúsen' gosaclaže' yesebeje'ne' diža' da' yosočhine' cont yosožie'ne' xya chol, na' gosenabde'ne' še guac to beñe' yele'e len no'ol che'.

³ Na' Jesúsen' boži'e xtižen', gwne':

—Ca nac dan' bzoj da' Moisésen', ¿nac bene' man-dadw gonle?

⁴ Legaque' gosene':

—Moisésen' gwne' cate' to beñe' yele'e len no'ol chen' cheyala' chas to yiš da' gwnežjue' no'ol che' ga güe'en diža' besyele'ena'.

⁵ Nach Jesúsen' gože' legaque':

—Moisésen' gwne' gac gonle ca' lagüe dan' nacle bene' güedenag len Diosen'. ⁶ Perw cate' gwxe yežlion', cate' bxe Diosen' yogo' da' de, bi goquen ca'. Le nyojen žan: “Bene' legaque', to bene' byo na' to no'ole.” ⁷ “Da'nan' bene' byon' gwsane' xaxne'e cont soalene' no'ol chen', ⁸ na' chope' yesaque' ca toz bene'.” Na' ca' bich yesac chope' san toze'. ⁹ Da'nan' bi cheyała' yesyele'e, le Diosen' ba bcode' legaque'.

¹⁰ Cate' besyežine' yo'o, bene' ca' zjanaque' le' txen da' yoble gosenabde'ne' bi zejen dan' ba gwne'.

¹¹ Na' Jesúsen' gože' legaque':

—Note'teze bene' chele'e len no'ol che' na' cheque'e no'ol yoble, chone' da' xinj, le toz ca naquen šaca' gata'lene' no'ol che bene' yoble. ¹² Na' še no'olen' chsane' bene' chen' na' cheque'e bene' yoble, lecze toz can' nac da' xinj da' chonen'.

Jesúsen' gwñabde' Diosen' gac güen che bidao' ca' besežag

(Mt. 19:13-15; Lc. 18:15-17)

¹³ Nach jasesane' bi' bixjw lao Jesúsen' cont xoa ne'e yichjgacbe', perw bene' ca' zjanaque' le' txen gosedile' bene' ca' zjanche'ebe'. ¹⁴ Na' cate' ble'e Jesúsen' can' gosonen' na' bže'e legaque' na' gože'ne':

—Le güe' latje yesid bidao' ca' lagua' nga na' bi gwžonle, le bene' ca' zjanac ca bidao' quinga, legaque' chosozenague' che Diosen' cont chnabi'e yichjlažda'ogaque'. ¹⁵ Da' li žia' le'e, note'teze bene' cheyała' yosozenague' che Diosen' ca che-son bidao' cate' chosozenagbe' che xaxna'be', le bene' bi yosozenague' ca', gwbat nabia' Diosen' yichjlažda'ogaque'.

16 Nach gwłene' to to bidao' ca' na' gwṇabde' Diosen' gac güen chebe', gwṇoa taquen' yichjbe'.

To bene' güego' bšaljlene' Jesúsen'

(Mt. 19:16-30; Lc. 18:18-30)

17 Cate' Jesúsen' gwze'e ngüe'e nez, chxonjses to bene' jazoa xibe' lagüen' na' gwṇabde'ne':

—Maestro, le' naco' bene' güen. ¿Bi cheyalā' gona' cont gata' yelā' mban chia' toli tocanē'?

18 Jesúsen' gože'ne':

—¿Bixchen' žo' naca' bene' güen? Toze bene' güen zoa, na' len' Dios. 19 Le' nezdo' da' none' mandadw goncho: “Bi gata'lenle no'ol bi nac no'ol chele o bene' byo bene' bi nac bene' chele; nono gotle; bi cuanle; bi güe'le diža' güenlaže' che bene' lježle; bi siye'le bene'; le gap bala'an xaxna'le.”

20 Na' boži'e xtižen':

—Maestro, yogo' da' quinga chzenaga', gwzola'gua' chonczan' cate' ne' nactia' bidao'.

21 Jesúsen' gwne'e bene' güegon' na' chacde' le', na' gože'ne':

—Zoa to da' ne' chyažjen gono': šjayeto' yogo' da' de chio' na' da' le'edo' chen bnežjon bene' yaše'. Nach še gono' ca', cate' yežino' yaba gan' zoa Diosen' da' zaca'ch gata' chio'. Na' še ba beyož beno' can' žia' le', nach yo'o gaco' neda' txen la' saca'zi'o.

22 Na' cate' bene ben' dan' gwna Jesúsen', gocde' leca zdebe naquen gone' can' gože'ne', na' beza'yaše', le bene' gwṇi'achgua goque'.

23 Nach Jesúsen' gwne'e do cue'ej cuite' na' gože' bene' ca' zjanaque' le' txen:

—Leca zdeb naquen to bene' gwṇi'a gwzenague' che Diosen' cont Diosen' nabi'e yichjlažda'ogüe'.

24 Na' be_{ne}' ca' zjanaque' le' txen besyebande' can' gwnen', perw Jesúsen' goze'e le_{ga}que':

—Xi'ina', be_{ne}' chesacde' zaca'chgua yela' gw_{ni}'a che_{ga}quen', le_{ca} zdebe naquen yosozenague' che Diosen' cont nabi'e yichjlažda'ogaquen'. 25 Bedao'ch te to be xen be nzi' camello to lo' nag yeše' clel ca to be_{ne}' gw_{ni}'a gwzenague' che Dios cont Diosen' nabi'e yichjlažda'ogüe'.

26 Cate' gosende' dan' gwne', le_{ca} besyebande' na' gose' lježe':

—¿Noxen' šjayzoa len Diosen' še ca'?

27 Jesúsen' gw_{ne}'e le_{ga}que' na' gože'ne':

—Bibi de da' gac yeson benachen' cont šjasyenite' len Diosen', perw Diosen' guac gonen'; le bi zoa da' nacho da' bi gac gon Dios.

28 Nach Pedron' gože'ne':

—Neto' ba gwlejjyichjto' yogo' da' de cheto' cont nacto' le' txen.

29 Jesúsen' boži'e xtižen':

—Da' li žia' le', note'teze be_{ne}' ba gwlejjyichje' liže', be_{ne}' biše', zane', xe', xne'e, no'ol che', xi'ine', o yežlio che' ne chia' neda' na' neche chzenague' xtižan', 30 yežlio nga yonežjo Diosen' le' to gayoa ca'te'le, yo'o, biše', zane', xne'e, xi'ine' na' yežlio, la'czla' yesebe'na'ogüe' le'. Na' cate' yežine' yaban' gata' yela' mban' che' toli toca_{ne}. 31 Perw zan be_{ne}' zjanaque' be_{ne}' žialao na'a, gwžin ža cate' yesaque' be_{ne}' bzebe; na' be_{ne}' zjanaque' be_{ne}' bzebe na'a, gwžin ža cate' yesaque' be_{ne}' žialao.

*Da' yoble Jesúsen' gwne' yesote'ne'
(Mt. 20:17-19; Lc. 18:31-34)*

³² Zjangü'e nez zja'aque' bso dan' zoa ga_la'ze Jerusalén_na' na' Jesúsen' žialagüe' lao be_ne' ca' zjanaque' le' txen. Legaque' chesyebande' na' do chesežebze' zjana'ogüe' le'. Nach da' yoble Jesúsen' goxe' be_ne' šižinw ca' ca'ale ga nac lchojiže' na' gože' legaque' can' gac chen'. ³³ Gože'ne':

—Na'a ba zejcho Jerusalén gan' yesone' neda' lo na' b_xoz gwnabia' ca' na' lo na' be_ne' ca' chososed chosolo'ede' dan' bzoj da' Moisés, na' yesechoglagüen' chia' yesote' neda' na' yesone'nda' lo na' be_ne' bi zjanaque' be_ne' Israel, nedan' naca' ben' gwsela' Dios golja' benach. ³⁴ Yesezi'diže' neda', yesot yeseyine' neda', gosoži'enda' xene', na' yesote' neda', perw yeyon ža yebana' ladjo be_ne' guat ca'.

Jacobo na' Juan gosenabe' to goclen lao Jesúsen' (Mt. 20:20-28)

³⁵ Nach Jacobo len Juan, be_ne' ca' zjanac xi'in Zebedeo, gosebigue' cuit Jesúsen' na' gose'ene':

—Maestro, chaclaže'to' gono' to goclen da' nabto'.

³⁶ Na' gw_nabe Jesúsen' legaque':

—¿Bi che'nele gona'?

³⁷ Na' gose'ene':

—Ben cont cue'to' šla'a güeje cuito'na' cate' solao nabio'.

³⁸ Nach Jesúsen' gože'ne':

—Le'e cabi nezele bi dan' ch_nable. ¿Gw_chejlaže'le tele yela' zi' yela ya' ca dan' tia' neda' na' gac chele can' gac chia'?

³⁹ Legaque' gose'ene':

—Gw_chejlaže'to'.

Na' Jesúsen' gože' legaque':

—Da' licze tele yela' zi' yela' ya' ca dan' tia' neda' na' gac chele can' gac chian'. ⁴⁰ Perw bi naquen lo na' nia' non' cue' cuitan' cate' žin ža nabi'a, san yesebe' bene' ba mbej Diosen' gaquen che'.

⁴¹ Cate' yeši bene' ca' zjanaque' le' txen gosende' xtiža'gaquen', beseloque' Jacobon' na' Juanna'. ⁴² Perw Jesúsen' goxe' yogüe' cont gosebigue' laogüen' na' gože' legaque':

—Neczezele bene' zjambeje' cont chesenabi'e to to naciön na' bene' blao ca' chesone' byen chosozenag bene' chegaque'. ⁴³ Perw bi naquen ca' len le'e. San note'tezle chaclaže'le gacle bene' blao, cheyala' gwzexjwlaže'le gaclenle bene' lježle. ⁴⁴ Na' note'tezle chaclaže'le gacle bene' žialao, cheyala' gon cuinle ca xmos yogo' bene' lježle. ⁴⁵ Le lencze neda', gwseła' Diosen' neda' golja' beňach, gague za'a cont yesaclen bene' neda', san za'a cont gaclena' bene', na' gwnežjw cuina' yesote' neda' neche xtoła' beňachen'.

Jesúsen' beyone' to bene' lchol ben' gože' Bartimeo (Mt. 20:29-34; Lc. 18:35-43)

⁴⁶ Nach besežine' Jericó. Na' cate' Jesúsen' ba beze'e ciudan' len bene' ca' zjanaque' le' txen na' len yezanch bene', do cho'a ciudan' chi' to bene' lchol chanez chnabe' yosonežjo bene' le' con gaca' da' chesezande'. Bena' le' Bartimeo na' naque' xi'in to bene' le' Timeo. ⁴⁷ Na' bene' lchola' cate' gocbe'ede' gwde Jesús bene' Nazaret gan' chi'ena', gwzolağüe' gwne' zižje gwne':

—¡Jesús, xi'in diaža che da' rey David, beyaše'laže'sca neda'!

⁴⁸ Bene' zan gosedile' le' cont bich yosye'e, perw bosya'adiache' gwne':

—iXi'in diaža che da' rey David, beyaše'laže'sca neda'!

⁴⁹ Nach Jesúsen' gwleze' na' gwne':

—Le gaxe'.

Nach gosaxe' bene' lchoła' na' gose'ene':

—Benčachlažo', gwzoža', le chaxe' le'.

⁵⁰ Nach gwcho'one' lache' da' nxo'a cože' na' bx-ite' jabigue' lao Jesúsen'. ⁵¹ Nach Jesúsen' gwṇabde' le':

—¿Bi chaclažo' gonda' le'?

Bene' lchoła' boži'e xtižen':

—Maestro, che'nda' yele'eda'.

⁵² Nach Jesúsen' gože'ne':

—Guac yeyejo'. Dan' chejnilažo' neda' ba beyac yejlaguon'.

Na' la' bele'ete bene' lchoła', na' gwda'ogüe' Jesúsen'.

11

Jesúsen' gwyo'e ciuda Jerusalén

(Mt. 21:1-11; Lc. 19:28-40; Jn. 12:12-19)

¹ Cate' ba zoa yesežine' Jerusalén, besežine' gan' zjachi' yež dan' zjanzi' Betfagé na' Betania na' gan' zoa ya'a da' nzi' Ya'a Olivos. Na' Jesúsen' gwsele' chop bene' ca' zjanaque' le' txen mandadw, ² gožgaque'ne':

—Le šja'ac yež dan' chi' gala'ze, na' cate' žinlen' na' yeželele to burr dao' da'ba' yag be nono na' cuia. Le sežba' na' le che'ba' nga. ³ Na' še no chṇab bičen' chonle ca', le ye'e: “Xanto' chyažjde'ba'”, na' la' gwzantecze'ba'.

4 Nach gosa'aque', na' besele'ede' burron' da'ba' yag to cho'a yo'o cuit ga xoa to nez, na' goseseže'ba'.

5 Na' bał beņe' ca' nita' na' gose'ene':

—¿Bixen' chonle? ¿Bixchen' chsežle burron'?

6 Nach bosyoži'e xtižen' can' gož Jesúsen' legaque', na' goso'e latje goseseže'ba' cont goseče'eba'.

7 Nach goseče'e burron' lao Jesúsen' na' gosexoa xagaque' cože'ban' na' gwžia Jesúsen' leba'. 8 Na' beņe' zan gosonxene' Jesúsen' goseyixjw no xagaque' lo nez cont blej burron' len na' yebale' gosechogue' xoze' yag na' goseyixjuen' lo neza'.

9 Beņe' zjažialao na' lecze beņe' za'ac cože' gosezomagüe' bososye'e, gosene':

—¡Leca zaca'chgua bengal! ¡Mbalaz ben' za' nga nselā' Xancho Diosen' le' cont nabi'e! 10 ¡Mbalaz yela' gwnabia' che' da' nse'e, le' nabi'e ca' da' xozxta'ocho David! ¡Leca zaca'chgua Dios ben' zoa yaban'!

11 Can' goc, Jesúsen' gwyo'e Jerusalén, na' lecze gwyo'e chyo'o che yodao' blaon'. Na' beyož gwne'e yogo'lol' da' de na', beyeje' Betania len beņe' šižinw ca' ba gwleje' cont zjanaque' le' txen, le ba zoa gal.

*Jesúsen' gwne' gacxi'a yag yixgüigw da' bibi žia
(Mt. 21:18-19)*

12 Beyechj ža cate' besyeya'aque' Betania, Jesúsen' gwdone'. 13 Na' zito' ble'ede' to yag yixgüigw da' žia laga', na' jane'e še žia yaguen' yixgüigw, na' bibi bželde', san laga'ze ca' da' žian, le gague canan' chesebia yixgüigon'. 14 Nach Jesúsen' bol güiže' yag yixgüigon', gožen':

—Noch no gagw da' chbio' le'.

Na' beņe' ca' zjanaque' le' txen gosende' can' gwnen'.

Jesúsen bešaše' beṇe' ca' cheson ya'a chyo'o yodaon'

(Mt. 21:12-17; Lc. 19:45-48; Jn. 2:13-22)

¹⁵ Gwdena' besežine' Jerusalén. Na' cate' gwyo'o Jesúsen' chyo'o yodao' blaon', gwzologüe' bešaše' beṇe' ca' chesote' na' beṇe' chesa'o na'. Na' bchiṇe' xmes beṇe' ca' chosoša' mechw na' yag ga chesebe' beṇe' ca' chesote' ngolbex. ¹⁶ Na' bi be'e latje yesexoa xnez beṇe' zjanoa' yoa' chyo'o yodaon'. ¹⁷ Na' bsd blo'ede' beṇe' ca' že' na', gože'ne':

—Nyocze Xtiža' Diosen' žan: “Yesene' ližan' naquen latje gan' šja'ac beṇe' yogo' nación yosol güiže'nda”, perw le'e ba benlen ca to latje ga že' beṇe' gwban.

¹⁸ Na' bṇoz gwnabia' ca' na' beṇe' ca' chososed chosolo'e dan' bzoj da' Moisés gosende' can' gwnen', na' goseyiljwlaže' nacle yesone' yesote'ne'. Ba chesežebe' Jesúsen', le yogo' beṇe' besyežejde' can' bsd blo'eden'. ¹⁹ Perw na' cate' gol, Jesúsen beze'e ciudan'.

Gwbiž yag yixgüigon'

(Mt. 21:20-22)

²⁰ Beyeṇj ža šezil, gosodie' na' besele'ede' yag yixgüigon' ba gwbižen lente loen. ²¹ Nach Pedron' jayze'ede' na' gože' Jesúsen':

—Maestro, gwṇa' yag yixgüigw dan' gwnao' gacxi'an, ba gwbižen.

²² Jesúsen' boži'e xtižen':

—Le šejnilaže' Dios. ²³ Da' li žia' le'e, note'teze beṇe' ye'e ya'a nga: “Gwcuase nga na' jayzoa lo' nisdao”, še bi chacžejlaže' lo' yichjlažda'ogüe', san chejnilaže' Diosen', guacczen. ²⁴ Da'nan' žia' le'e,

yogo'te da' nable cate' chol̄ güižle Dios, le šejle' guaqueczen, na' le gacczen. ²⁵ Na' cate' chol̄ güižle Dios, še zoa da' chac chele len bene' yoble, le yezi'xen che', cont lecze ca' Xacho Dios ben' zoa yaba yezi'xene' che xtoła'le. ²⁶ Perw še le'e bi yezi'xenle che bene', Xacho Dios bene' zoa yaba bi yezi'xene' che xtoła'le.

Yela' gwnabia' che Jesúsen'

(Mt. 21:23-27; Lc. 20:1-8)

²⁷ Nach ja'aque' Jerusalén da' yoble, na' šlac chda Jesúsen' chyo'o yodao' blaon' jasebiga' b̄xoz gwnabia' ca' na' bene' ca' chososed chosolo'e dan' bzoj da' Moisés na' len bene' gole blao' ca' chesenabi'e naciónna'. ²⁸ Na' gosenabde' le':

—¿Bi yela' gwnabia' napo' chono' da' qui? ¿No ben̄ yela' gwnabian' cont chonon'?

²⁹ Jesúsen' boži'e xtižen', gwne':

—Leze de to da' nabda' le'e na' še yoži'ile xtižan', nach n̄ia' le'e bi yela' gwnabia' chonlendan'. ³⁰ ¿No gwseła' da' Juanna' bzoe' bene' nis? ¿Dios nan' gwsele'ne' še benachen'? Le yoži'i xtižan'.

³¹ Nach legacze' gose' lježe':

—Še ye'chone' Dios gwsele' le', na' ye'e chio': “¿Bixchen' ca gwyejle'le che'?” ³² Bi gac ye'chone' benach gwseła' le'.

Gosene' ca' da' besežebe', le yogo'te bene' že' na' gosejle'e Diosen' gwsele' da' Juanna' be'e xtiže'na'.

³³ Nach gose'e Jesúsen':

—Bi nezeto'.

Nach Jesúsen' gože' legaque':

—Lecze neda' bi yapa' le'e bi yela' gwnabian' chonlenda' da' ca'.

12

*Jempl che bene' güen žin ben' gosaque' bene' mal
(Mt. 21:33-46; Lc. 20:9-19)*

¹ Nach Jesúsen' gwzologüe' choe'lene' legaque' diža' chzoe' jempl, na' gože' legaque':

—Gwzoa to bene' goze' to cue' xen yag uvas na' gwlo'en le'ej. Na' bene' to ga yesesie' uvasen' cont choj xisen', na' bene' yeto da' sibe ca to campanario ga yesecua' bene' yosogüia yesene'e yag ca'.

'Nach bcua'ane' yežlion' lo na' bene' yesonši'e yag uvasen', na' gwze'e gwyeje' zito'. ² Na' cate' bžin ža yosyotobe' cosešen', gwsele' to xmose' lao bene' ca' nac lo na'gaque' yag uvasen' cont yosonežjue'ne' to tlacw coseš dan' yesyezi'en. ³ Perw na' bene' ca gosezene' mosen' gosot goseyine'ne', na' to ga'alze' bosyose'ene' bibi goso'ene'. ⁴ Nach xan yežlion' da' yoble gwsele' yeto xmose'; perw benga bosožie'ne' yej, gosone' güe' yichje' na' gosonde' le' zgot. ⁵ Nach xan yežlion' gwseła'che' yetoe', na' benga gosotecze'ne'. Gwdena' gwseła'che' bene' zan, na' bale' gosot goseyine' le' na' yebale' gosotecze'ne'.

⁶ Ne' zoa yeto bene' bina' sele', bena' xi'ine' bene' chacchgüede', na' bzebte gwsele' le', le bene' xbab: “Yesezi'e xtižen'.” ⁷ Perw bene' ca' gose' lježe': “Bengan' yega'anlene' yežlio nga cate' gat xen'. Le da gotchone' cont yega'anlenchon.” ⁸ Na' gosezene'ne', gosote'ne', na' besyebeje' cuerp chen' gan' že' yag ca', bosozalen' ga yoble.

⁹ Nach Jesúsen' gwñabe':

—¿Bi chaquele? ¿Nacxe gon xan yežlion' len be_{ne}' ca' bocua'anlene' yag uvas chen'? Šeje' šjetoe' legaque', na' yodie' yežlion' lo na' be_{ne}' yoble.

¹⁰ '¿Bi_{na}' gwlable ga nyoj Xtiža' Diosen'? žan quinga:

Ye_j dan' bi gosac_{la}že' be_{ne}' g_üen yo'o ca' yoso_{ch}ine',
len ba naquen ye_j squin.

¹¹ Da' nga ben X_{an}cho Dios, na' naquen to da' yežejecho.

¹² Nach gosac_{la}že' yesezene' Jesúsen', le gosacbe'ede' be'e jemplna' ne_{ch}e dan' bi chesejnilaže' le'. Perw besežebe' še bi yesone be_{ne}' ca' nžaguen' legaque', da'nan' bosocua'ane'ne' na' besyeya'aque'.

Ca nac che dan' cheyala' gaxjw

(Mt. 22:15-22; Lc. 20:20-26)

¹³ Gwdena' gosese_{le}' ba_l be_{ne}' fariseo na' ba_l be_{ne}' ca' goseda' Herodes cont yesebeje' Jesúsen' diža' da' yosode'ede' cont yesag_üe' xya che'.

¹⁴ Be_{ne}' ca' ja'aque' na' gose'ene':

—Maestro, nezeto' zoatezo' cho'o diža' li na' bi chono' cuent bi ža be_{ne}', le toze can' chono' len note'teze be_{ne}'. Na' nezeto' diža' li cho'o chsed chlo'edo' be_{ne}' can' chazlaže' Diosen' goncho. Da'nan' zedenabeto' le' ¿naquen binlo no chixjo da' cheyala' chixjo che ben' nac la'zelag_üe be_{ne}' gwnabia' ben' chi' Roma? ¿Gwdixjwton', še bi chixjwton'?

¹⁵ Jesúsen' gocbe'ede' gague do lažen' chese'ene' ca', san chesac_{la}že' yeson_{le}'de' le' len xtiža'gaquen', nach gože'ne':

—¿Bixchen' chaclaže'le yoslažo'le neda' len xtižan'? Le gon neda' to mechw cont na'an.

¹⁶ Na' goso'enen', na' cate' ble'eden' na' Jesúsen' gwnabde' legaque':

—¿No lao dan' da' le'e mechw nga? na' ¿no la dan' nyoj le'en ni?

Nach bosoyoži'en gose'ene':

—Che César ben' nac la'zelagüe bene' gwnabian' ben' chi' ciuda Roman'.

¹⁷ Nach Jesúsen' gože'ne':

—Le gwnežjo bene' gwnabian' da' nac che bene' gwnabia', na' le gwnežjo Dios da' nac che Dios.

Na' besyebande' can' boži'e xtižen'.

Gosenabde' le' bi zejen dan' yesyeban bene' guat ca'

(Mt. 22:23-33; Lc. 20:27-40)

¹⁸ Nach besežin bal bene' saduceos gan' zoa Jesúsen'. Bene' ca' chesene' bene' guaten' bich yesyebane'. Nach gosenabde' le', gose'ene':

¹⁹ —Maestro, da' Moisésen' bzoje' can' cheyała' goncho, gwne' še to bene' byo gate' na' chzeb no'ol chen' perw na' nono bi' güezeb chga'an, na' bene' biše' ben' ba got cheyała' yošagna'lene' no'ol güezeba' cont yesenita' xi'in diaža che da' bišen'. ²⁰ Gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. ²¹ Na' bene' gwchopa' bošagna'lene' no'ol güezeba', na' lecze gote' nono xi'ine' gwnita'. Lecz ca' goc len bene' gwyona'. ²² Na' ca' goc gosedaš bene' gaža' bosošagna'lene' no'ola', na' ne toe' ca' gosezoa xi'ine' len le'. Gwde gosat yogo'lol bene' ca', ca' beyožen got len no'ola'. ²³ Gož neto', cate' yesyebane' ladjo

be_{ne}' guat ca' ¿nox be_{ne}' ca' soalene' no'ola' ca xo'ole'? le yogo' be_{ne}' gaža' bosošagna'lene' le'.

²⁴ Nach Jesúsen' boži'e xtižen', gwne':

—Clelen' chonle xbab dan' žale ca', le bi nezele can' ža Xtiža' Dios da' nyojen, ne_{ca} nombia'le yela' guac chen'. ²⁵ Cate' yesyeban be_{ne}' guat ca' bich yosošagna' be_{ne}', ne_{ca} yosonežjo xi'ine' no'ol gwšagne'e, le yesaque' ca angl be_{ne}' zjazoa yaba.

²⁶ Na' ca nac dan' yesyeban be_{ne}' guat ca', ¿bi_{na}' gwlable gan' bzoj da' Moisés, can' gož Diosen' le' caten' bol güiže'ne' to lo yag yeše' dao' da' chey? Gože'ne': “Neda' naca' Dios ben' chonxen Abraham, ben' chonxen Isaac, na' ben' chonxen Jacob.”

²⁷ Be_{ne}' guat ca' bi chesonxene' Diosen', san be_{ne}' zjamban. Na' ca nac le'e, leca clelen' chonle xbab.

Da' nac da' žialao da' cheyala' goncho

(Mt. 22:34-40)

²⁸ Leze bžin to be_{ne}' bsed blo'ede' ley dan' bzoj da' Moisés, be_{ne}' bende' caten' chesežeše' len Jesúsen', na' nezde' boži'icze Jesúsen' xtiža'gaquen' binlo. Na' bena' gw_nabde'ne':

—¿Non' nacch da' žialao da' zjanyojen da' ža Diosen' cheyala' goncho?

²⁹ Jesúsen' boži'e xtižen' gože'ne':

—Da' nga nacch da' žialao lao yogo'lolen, žan: “Le gwzenag be_{ne}' Israel gualaž chia', toze Xancho Dios naque' be_{ne}' zaca' gonxencho. ³⁰ Da'n_{an}' cheyala' gaquecho Xancho Diosen' con ca zelao chejni'icho, do yichj do laže'cho, do fuerz valor checho.” Len_{na}' naquen da' žialao lagüe da' ca' ža Diosen' cheyala' goncho. ³¹ Na' da' gwchopen' zejgalan' ca', gan' žan': “Cheyala' gaque lježcho

ca chaque cuincho.” Bich bi de da' že' cheya_la' goncho da' zaca'ch ca da' qui.

³² Nach ben' chsed chlo'e dan' bzoj da' Moisésen' gwne':

—Ca'yanen' naquen, Maestro. Da' licze can' gw-naon'. Toze Xancho Dios zaque' gonxenchone', na' noch no zoa bene' zaca'ch ca le'. ³³ Na' še gaquecho Dios, con ca zelao chejni'icho, do yichj do laže'cho, do fuerz valor checho, na' gaque lježcho ca chaque cuincho, lenna' zaca'chen ca yogo' da' choncho chotcho no beyixe' na' chzeycho_a' chonxencho Diosen'.

³⁴ Nach cate' goche'e Jesús_en' boži'icze' xtižen' to licha, gože'ne':

—Gague da' xen chyažjen cont nabdo' Diosen' nabi'e yichjlažda'oguo_n'.

Na' ne yetoe' bich beseyaxjde' bichle yese_nabde' Jesús_en'.

*Criston' naque' xi'in diaža che da' rey David
(Mt. 22:41-46; Lc. 20:41-44)*

³⁵ Jesús_en' bsed blo'ede' chyo'o yodaon', gwne':

—¿Nacxe_{ch}en' bene' ca' chososed chosolo'e dan' bzoj da' Moisés chesene' Criston' ben' gwlej Diosen' cont yedenabi'e naque xi'in diaža che da' rey David? ³⁶ Cuin Daviden' gwne' can' blo'e Spiritw che Diosen' le':

Xancho Dios gože' Xanan':

“Gwche'edo' cuita' nga nabi'acho txen, na' gona' cont yogo' no chesegue'e le' yosozexjw yichje' yosozenague' chio'.”

³⁷ ¿Nacxe gac nacho Criston' naque' xi'in diaža che da' David? le' cuin Davin' gože' le': “Xana”.

Na' zjanyanchgua be_{ne}' ca' chosozenag xtižen',
na' besyebede' xtižen'.

*Jesúsen' bcuiše' be_{ne}' ca' chososed chosolo'e ley
dan' bzoj Moisés*

(Mt. 23:1-36; Lc. 11:37-54; 20:45-47)

³⁸ Jesúsen' caten' chsed chlo'ede' legaque' gwne':

—Le gwsaca' cont bi gonle can' cheson be_{ne}'
ca' chososed chosolo'e dan' bzoj da' Moisés, le
chesyebede' chesaše' zjanyaze' lache' to_n, na'
chesyebede' chesap be_{ne}' legaque' bala'an cate'
chesyežague' lagüe ya'a. ³⁹ Chesyebede' chesebi'e
gan' chesebe' be_{ne}' blao cate' chja'aque' yodao' na'
cate' chac l_{ni}. ⁴⁰ Legaque' cheseque'e yo'o che no'ol
güezeb ca', na' cate' chosol güiže' Dios, sša cheso'e
diža' cont yesaque be_{ne}' leca chesonxene' Diosen'.
Be_{ne}' can' yesacche' castigw cl_{el} ca' yezica'chle
be_{ne}' güen da' xinj.

To no'ol güezebe be'e Diosen' xmechue'

(Lc. 21:1-4)

⁴¹ Na' šlac zoa Jesúsen' chyo'o yodaon', gwchi'e
gala'ze gan' xoa caj gan' chesegüe'e mechw che
yodaon', na' ch_{ne}'e can' chesego'o be_{ne}' mechw.
Na' zan be_{ne}' gw_{ni}'a ca' chesegüe'e da' zcha'o
mechw. ⁴² Ca' chac, cate' bžin to no'ol güezebe be_{ne}'
yaše', gwlo'e chop mechw dao' da' bibi zaca'tec.
⁴³ Nach Jesúsen' goxe' be_{ne}' ca' zjanaque' le' txen
na' gože'ne':

—Da' li žia' le'e, no'ol güezebe yaše' nga ba
gwlo'oche' mechw da' zaca'ch len Diosen' cl_{el}
ca' yogo' be_{ne}' ca' chesego'o mechw lo' cajen',
⁴⁴ le yogo' legaque' chesegüe'e da' checho'onen lo'
yela' gw_{ni}'a chegaquen', perw no'ol nga, lo' yela'

yaše' yela' zi' che' gwlo'e yogo' da' de che' da' chachbanlende'.

13

Jesúsen' gwne' gwžin ža yosyočinje' yodao' blaon'

(Mt. 24:1-2; Lc. 21:5-6)

¹ Cate' cheza' Jesúsen' yodao' blaon' to beņe' ca' zjanaque' le' txen gože'ne':

—iMaestro, gwŋa'šc catec xdan zjanac yej qui na' yo'o qui!

² Na' Jesúsen' boži'e xtižen', gože'ne':

—Ca nac yo'o xen qui chle'echo, žin ža cate' ne to yej da' zjancua' nga ca yega'an zjancua' cože' lježen. Yogon' yosyočinje'.

Can' gac cate' ba zoa yeyož yežlion'

(Mt. 24:3-28; Lc. 21:7-24; 17:22-24)

³ Nach ja'aque' Ya'a Olivos gan' nla' yodao' blaon'. Na' cate' ba chi' Jesúsen' lo ya'an len Pedro na' Jacobo, na' Juan na' Andrés, beņe' ca' zjanaque' le' txen, legaque' gose'ene' šižize:

⁴ —Che'neto' ŋao' neto' batcan' gac da' ca'. ¿Nac gac nežeto' cate' ba zoa gac yogo' da' ca'?

⁵ Jesúsen' boži'e xtižen', gwne':

—Le gwsaca' cont nono siye' le'e. ⁶ Le beņe' zan yesaš yežlio nga yesaclaže' yosolane' xlatja' nga, yesene': “Nedan' naca' Cristo ben' gwlej Diosen' cont ŋabi'e.” Na' yeseziye'e beņe' zan.

⁷ Na' cate' yenele chac gwdile nile nale, o yenele guac gwdile, bi žeble, le can' cheyała' gac. Perw gague lenna' nacho ba bžin ža yeyož yežlion'. ⁸ Le yesedił to yež len yeto yež yoble na' to nación len

yeto nación yoble, na' zan cuen ga xo'chgua lo yežlion', na' gata' gwbin na' yesebec beņe' žaš. Na' da' qui gac cate' za' solao gata' yela' zi'.

⁹ 'Na' le gwsaca' can' gonle, le yesone' le'e lo na' beņe' gwnabia' ca' cont yesot yeseyine' le'e lo' yodao' chegaquen', na' dan' chejnilaže'le neda' nita' beņe' yeseče'exoxje' le'e no lao rey no lao nochle beņe' gwnabia', na' can' güe'lenle legaque' xtižan'.

¹⁰ Le za' te che yežlion', xtiža' Diosen' cheyala' gas laljen doxen yežlion'. ¹¹ Na' cate' yesezene' le'e

na' yeseče'e le'e lao beņe' gwnabia' ca', bi cuec yichjle nac yoži'ile xtiža'gaquen', neca gonlen xbab.

San le na con da' ye' Diosen' le'e nale lo hor na'teze, le gague le'eczen' nele, san Spiritw che Diosen'

gonen ga nale bin' cheyala' nale. ¹² Cana' bal benach yesechje' yesone' beņe' biše' golje' lo na' beņe'

yesot legaque', na' nita' beņe' yesone' xi'ingaque' lo na' beņe' yesot legacbe', na' nita' beņe' yesone

xaxne'e lo na' beņe' yesot legaque'. ¹³ Yogo'ze beņe' yesegue'ede' le'e dan' chejnilaže'le neda', perw

note'tez le'e gwyo gwchejlaže'le cont bi cuejyichjle dan' chejnilaže'le neda' žin žate gatle, nach šjayzoale len Diosen'.

¹⁴ 'Da' Daniel ben' gwduxjue'ede' xtiza' Dios bzoje' che da' zbanchgua da' gwxinjen latje gan'

chonxencho Diosen'. Na' cate' le'e le'ele ba zoa dan' gan' bi cheyala' soan, cana' beņe' yesenita'

distritw Judea cheyala' yosoxonje' šja'aque' do ya'adao'. (Beņe' gwlaben' cheyala' šejni'iden'.)

¹⁵ Na' beņe' chda do yichjo' che liže' žana', bi yeyetje' yotobe' xšinlaze' ca' že' ližen', con yoxonje'.

¹⁶ Na' beņe' chda yiže' bi yeyej liže' šjayxi' xalane'. ¹⁷ iNyaše'chguae zjanac no'ol ca' zjanao' xi'in, na'

no'ol ca' ne' chosoguaže' bidao' lo ža ca'! ¹⁸ Le ṇab lao Dios bi yažjen gwxonjle caten' chac zag, ¹⁹ le yesaquen ža da' leca yesale' bene'. Cate' bxete Diosen' yežlio na' ža ṇa'aža nono ṇa' gale' ca', ṇeca žinlažen' yesale'de' ca' da' yoble. ²⁰ Na' šaca' Xancho Diosen' bi yozaše' žan' yesac ca', notno yela, perw yozašen' ṇeche chacde' bene' ca' chesejnilaže' le', bene' ba gwleje' zjanaque' xi'ine'.

²¹ 'Cana' še no ye' le'e: "Le ṇa'šč, nga zoa Cristo ben' gwlej Diosen' cont ṇabi'e", o "Le ṇa'šč, na' zoe", bi šejle'le. ²² Le yesaš bene' gwxiye' bene' yesaclaže' yosolane' xlatja' nga, na' yeson cuine' ca' bene' chesoe' xtiža' Dios. Na' yesone' yela' guac da' yesele'e bene' na' bichle da' zaca' yesyebande' cont yeseziye'e legaque', na' len bene' ca' ba gwlej Diosen' zjanaque' xi'ine' yesaclaže' bene' gwxiye' ca' yeseziye'e šaca' gac yeseziye'e legaque'. ²³ Perw ca' nac le'e, le gwzenag, le ba gwduxjue'eda' le'e yogo' can' gac.

Can' gac cate' ben' gwsela' Diosen' golje' benach yide' da' yoble

(Mt. 24:29-35, 42-44; Lc. 21:25-36)

²⁴ 'Perw ca' nac ža ca' cate' yeyož gale'le can' gwnia', gwbižen' yeyaquen chol na' bion' bich gwsenin'. ²⁵ Na' beljw ca' yeselažon' le'e yaban', na' yogo' da' chle'echo le'e yaban' yesaquen ca' chac yežlion' cate' chxo'. ²⁶ Nach bene' že' yežlion' yesele'ede' neda' naca' ben' gwsela' Diosen' golja' benach za'a ladjo bejon' len yela' guac xen na' yela' bene' zaca' juisyw chian'. ²⁷ Nach sela' angl chian' yosyotobe' yogo' bene' ca' ba gwleja'

cont zjanaque' neda' txen gate'teze nite' doxen lo yežlion', ga zelao nac zito'.

²⁸ Le gwzenag che jempl nga che yag yixgüigon': Cate' ba chzolao chebešjw yaguen' na' chelan' laga' che'en dao', nezele ba za' lagüe ba. ²⁹ Na' lecze cate' le'ele ba chac da' mal ca' ba gwnia', cana'ch nezele ba za' juisyw, ba zoa gala'. ³⁰ Da' li žia' le'e, biṇa' yenit diaža che le'e nita'le ṇa'a cate' yeyož gac yogo'lol da' ca'. ³¹ Le'e yaban' na' yežlion' yesede čen, perw ca nac xtižan', gague da' te cbi gac can' žanṇa'.

³² Perw nono neze bi ža bi horen' gac ca', ne angl ca' nita' yaba, neca neda' naca' Xi'in Diosen' bi nezdā'. Toze Xa' Dios neze.

³³ Da'nan', le soa le cueze, le güia le ṇa', na' le soateze yol güižle Dios, le nono neze batcan' žin ža. ³⁴ Naquen ca nac che to beṇe' šeje' zito', na' cate' za' se'e choṇ liž xlatje' lo na' beṇe' güen žin che', cho'e žin da' yeson to toe', na' chzoe' beṇe' chape' cho'a yo'ona'. ³⁵ Le soa le cueze ca beṇe' chesape' liže'na', le bi zjaṇezde' batcan' yela' xan yo'on, še cate' ba zoa gal, še chel, še cate' chbež jea, še cate' ba gwyeni'. ³⁶ Le xož yele'e zejzenez na' yedole'de' legaque' chesetase'. ³⁷ Da' nga žia' le'e leze žiczan' par yogo'lol beṇe'. Le soa le cuez batcan' žin ža.

14

Bosoxi'e yesezene' Jesúsen'

(Mt. 26:1-5; Lc. 22:1-2; Jn. 11:45-53)

¹ Yečhop ža za' gala' pascw na' lni dan' chesone' caten' chesagüe' yetextil dan' bibi levadura yo'on. Na' bṁoz gwnabia' ca' na' beṇe' ca' chososed

chosolo'e dan' bzoj da' Moisés cheseyiljwlaže' nac yesone' yeseziye'e Jesúsen' cont yesezene'ne' yesote'ne'. ² Perw gosene':

—Bi senchone' lo l̄nin' cont ca yesebec beṇe' žaš.

*To no'ole bzoe' set zix yichj Jesúsen'
(Mt. 26:6-13; Jn. 12:1-8)*

³ Na' goquen' Jesúsen' zoe' Betania liž Simón ben' güe'e yižgüe' da' nzi' lepra. Na' šlac chi' Jesúsen' cho'a mes, bžin to no'ole noxe' to de yejese ga chož set da' chl̄a' zix, naquen dogualje da' bchoj lo yag yej da' nzi' nardo, na' zaca'chguan la'ay. Na' bzoxje' gan' yož seta' na' bzoačhočhje' seta' yichj Jesúsen'. ⁴ Na' baḷ beṇe' ca' zjanita' na' beseže'e, na' gose' lježe':

—¿Bixchen' benditjde' set zix nga? ⁵ Ša no bete' len güesonen ca no laxjw mos da' gone' gan tgüiz, na' gwnežjuen' gaclenen beṇe' yaše'.

Na' beseloque' no'ola'.

⁶ Perw Jesúsen' gwne':

—Jayen'. ¿Bixchen' chnele che no'olen'? Dan' bene' len neda' nga naquen güen. ⁷ Le beṇe' yaše' ca' bate'teze nita'cze' len le'e, na' guaque gonle len legaque' da' güen cate' žan chele, san neda' bich soacza' yesša len le'e. ⁸ No'ole nga bene' da' zelao gwzaque'de'. Ba bguazje' neda' set zix can' cheyaḷa' yesone' len neda' cate' gaša'. ⁹ Da' li žia' le'e, doxen yežlio gate'teze šjasedixjue'e beṇe' diža' güen dan' chzejni'in chia', decze de šjasyeze'ede' can' ben no'ol nga.

Judas gwčhoglaže' gwddie' Jesúsen' lo na' bene' ca' chesegue'e le'

(Mt. 26:14-16; Lc. 22:3-6)

¹⁰ Nach Judas Iscariote, ben' goque' txen len bene' ca' šižiṇw ben' gwlej Jesúsen' cont zjanaque' le' txen, gwyeje' jaṇe'e b̄xoz gwnabia' ca' cont yosoxi'e nac gone' gwddie' Jesúsen' lo na'gaque'.

¹¹ Cate' gosende' xtiža' Judasen', besyebede' na' gose'ene' yeso'ene' mechw. Nach Judasen' gwzolaküe' gwdiljwlaže' nac gone' gwddie' Jesúsen' lo na'gaque'.

Xše' dan' gosagüe' len Xanchon'

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Na' bžin ža čala' lṇi caten' neto' bene' Israel chagwto' yetextil dan' bibi levadura yo'o. Naquen ža nechw čhe lṇi pascw cate' chotto' xila' dao', cont šjayza'laže'to' can' bosla Diosen' da' xozxta'oto' ca' lo na' bene' Egipto ca'. Na' bene' ca' zjanaque' Jesúsen' txen gosenabde' le':

—¿Ga che'ndo' šjasiṇi'ato' cont gagwcho xše' čhe pascon'?

¹³ Nach gwsele' chop bene' ca' na' gože'ne':

—Le šja'ac ciudan', na' yežagle to bene' byo no'e to che'e nis. Le šjlene', ¹⁴ na' gan' yežinen', le ye' xan yo'on: “Maestrona' že': Goṇšco' to yo'o gan' gagwto' xše' ža lṇi nga len bene' ca' zjanaque' neda' txen.” ¹⁵ Nach gwlo'ede' le'e to quart xen dan' zoa yichjen na'ale gan' de yogo' da' chyažjecho. Na' le gwsini'a cont gagwcho na'.

16 Na' gosa'ac bene' ca' chope, na' besežine' ciudan', na' yogo' can' gož Jesúsen' legaque' goc, na' bososiñi'e xše' že' lñin'.

17 Cate' beyož gwxa gwbiž, bžin Jesúsen' len bene' šižinw ca' gwleje' cont zjanaque' le' txen.

18 Na' gosebi'e gosagüe' xše'. Na' šlac chesagüen', Jesúsen' gože' legaque':

—Da' li' žia' le'e, to le'e chagwle len neda' txen, gwdele neda' lo' na' bene' ca' chesegue'e neda'.

19 Nach legaque' besyeyaše'laže'de' na' gosezo-lagüe' tgüje tgüje' gosenabde' le' gosene':

—¿Nedan' gona' ca'?

Na' yetoe' leze gwne':

—¿Nedan' gona' ca'?

20 Na' Jesúsen' gože'ne':

—Ladjo le'e bene' šižinw, to bene' chagw len neda' txen toze lo' ye'eñ gon ca'. 21 Na' gac chia' can' nyoj le'e Xtiža' Diosen', neda' naca' ben' gwsela' Diosen' golja' beñach. Perw ñnyaše'chguaze nac ben' gwdie' neda' lo' na' bene' ca'! Yejn'acle ša bi goljen'.

22 Na' šlac chesagüe', Jesúsen' gwxi'e to yetextilen', na' beyož be'e yela' choxclen che Dios, bzoxjen', na' bnežjuen' legaque', gwne':

—Le gagon'. Lenna' cuerp chia'.

23 Nach bexae' to vas gan' yože nis uvasen' na' beyož be'e yela' choxclen che Dios, be'en legaque', na' yogüe' gose'eje' late' güej dan' yože lo' vassen'.

24 Na' gože' legaque':

—Da' ngan' xchena' na' chzanlažan' laljen neche yogo'lol beñach. Na' laljen cont solao gac da' coben' da' gwna Diosen' gone' gaclene' beñach. 25 Da' li

žia' le'e, bich ye'eja' x̄is uvas na'a. Cate'ch žin ža ba zoacho txen gan' chnabia' Diosen', canan' ye'ejan' da' yoble.

*Jesúsen' gwne' Pedroa' bi chebe' naque' le' txen
(Mt. 26:30-35; Lc. 22:31-34; Jn. 13:36-38)*

²⁶ Beyož gosole' gosonxene' Diosen' nach gosa'aque' ja'aque' Ya'a Olivos. ²⁷ Nach Jesúsen' gože'ne':

—Na'aže' yogo'le cuejyichjle neda' neche dan' gac chian'. Le nyojzen le'e Xtiža' Diosen', žan: “Gota' bene' güeyoe xilan' na' xila' ca' yesaslasba'.”
²⁸ Perw cate' yosban Diosen' neda' ladjo bene' guat ca', yobch yeya'a Galilea ca le'e.

²⁹ Nach Pedron' gože'ne':

—La' yogo' bene' quinga yesebejyichje' le', neda' bi gona' ca'.

³⁰ Perw Jesúsen' gože'ne':

—Da' li žia le', biņa' cuež jean' chop ni'a na'aže' cate' gac šon ni'a bi chchebo' še nombi'o neda'.

³¹ Perw Pedroa' do laže' gwne':

—La'czla' še chonen byen guatlencza' le', gwbat nia' bi nombia' le'.

Na' lecze ca' gosena' yogüe'.

*Jesúsen' bol' güiže' Xe' Dios Getsemaní
(Mt. 26:36-46; Lc. 22:39-46)*

³² Nach besežine' latje gan' nzi' Getsemaní, na' Jesúsen' gože' bene' ca' zjanaque' le' txen, gože'ne':

—Ngaze le cue'edo' šlac neda' šjel güiža' Dios.

³³ Na' gwche'e Pedro, Jacobo na' Juan, na' gwzolaon da' juisyw da' gocde' lo' yichjlažda'ogüen' na' benchgüe' xbab. ³⁴ Na' gože' legaque':

—Lo' yichjlažda'ogua' nga chacyaše'chgüeda', chacda' gatzca' catequen' chžaglagua'. Nga le yega'an na' le soa le na' txen len neda'.

³⁵ Nach Jesúsen' gwžialagüe' yelate' na' jachaze' coscho'ale lo yon' gwñabde' Dios še guac ten ca'ale bi gac can' ba zoa gac che'. ³⁶ Gože' Diosen':

—Xa', bibi de da' nacho da' bi chac gono'. Benšca cont bi saca'zi'a na' bi yesote'nda', perw bi chñaba' gac da' žia' neda', san gac da' nao' le'.

³⁷ Nach beyeje' gan' nita' beñe' ca' šone, na' ble'ede' zjanite' chesetase'. Na' gože' Pedron':

—Simón ¿chtason'? ¿Ne šlož da'oze ca goc cuejo' bišgal len neda'? ³⁸ Bi tasle, san le yol güiž Dios cont bi gon gwxiyen' le'e gan. Da' li lo' yichjlažda'olen' chña'laže'le gonle da' nac binlo, perw cuerp chelen' bi chzoeczen.

³⁹ Nach gwyeje' da' yoble na' bol güiže' Dios na' da' yoble gože'ne' dan' ba gožcze'ne' tñi'a. ⁴⁰ Nach bezyeje' gan' niten', na' da' yoble ble'ede' chesetase', le yejlagüen' chesexa' chesežoden' bišgal. Na' bi besyežellaže' nac yosyoži'e xtižen'. ⁴¹ Na' da' gwyone ni'a gwyeje' na' bezžine' gan' nita' beñe' ca' šone na' gože' legaque':

—¿Ne' chtasle? ¿Ne' chezi'laže'le? Ba goc. Ba gole' gon to beñe' neda' lo na' beñe' güen da' xinj ca', neda' naca' ben' gwseła' Diosen' golja' beñach. ⁴² Le chas, le yeyo'o. Ba za' ben' gon neda' lo na'gaque'.

Gosezene' Jesúsen' cont yeseche'ene' lao beñe' gwnabia' ca'

(Mt. 26:47-56; Lc. 22:47-53; Jn. 18:2-11)

⁴³ Jesúsen' ne' choe'te' dižan' ca' cate' bžin Judas, na' zan beñe' zja'aque' len le' zjanoxe' no yag, no

spada, bene' gosesela' b̄xoz gwnabia' ca' na' bene' gole blao ca' chesenabia' nación Israel cheton'. (Judasen' goque' to bene' šižinw ca' gwlej Jesúsén' cont zjanaque' le' txen.) ⁴⁴ Na' Judasen' ba gože' legaque' nac yesenezde' non' yesezene', gwne':

—Ben' gwnopa' xague', le'na'; le sene' na' le che'e.

⁴⁵ Na' cate' bžin Judasen' na' jabigue' gan' zoa Jesúsén' na' gože'ne':

—Maestro, Maestro.

Na' bnopene'. ⁴⁶ Nach gosezene' Jesúsén' cont yeseche'ene'.

⁴⁷ Perw to ben' zecha cuit Jesúsén' gwlej spada chen' na' gwdinen' mos che b̄xoz blaon' gwchogte' šla'a nagen'. ⁴⁸ Nach Jesúsén' gože' bene' ca':

—¿Nonle neda' ca' to bene' gwban za'acle zedexi'le neda' len spada na' len yag? ⁴⁹ Yogo' žaze gwzao' len le'e bsd blo'eda' bene' chyo'o yodao' blaon', na' bi gwzenle neda'. Perw chac da' qui cont chac can' nyoj Xtiža' Diosen'.

⁵⁰ Nach yogo' bene' ca' zjanaque' Jesúsén' txen bosoxnje' gosebejyichje'ne'.

Bi' güego' bin' boxonj

⁵¹ Na' to bi' güego' na'obe' Jesúsén', na' n̄xoá cože'be' toze sášana. Na' bene' ca' ba gosezene' Jesúsén' lecze gosenize'be'. ⁵² Perw gwlejyichjbe' sášanan' na' boxonjbe' ga'alyidbe'.

Goseche'e Jesúsén' lao bene' ca' chesenabia' nación Israelen'

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Nach goseche'e Jesúsén' lao b̄xoz blaon', na' besežag yogo' bene' ca' zjanac b̄xoz gwnabia', na'

be_{ne}' gole blao ca' chesenabi'e naci_on c_heton' na' be_{ne}' ca' bososed bosolo'ede' dan' bzoj da' Moisés.
 54 Na' Pedron' na'og_üe' Jesúsen' zito' le b_žintie' liž b_xoz blaon' na' gwyo'e chyo'ona' gwchi'e txen len be_{ne}' ca' chesape' yodao' blaon' boše'e cuine' cho'a yì'.

55 Na' ca' nac b_xoz blaon' na' yogo' be_{ne}' ca' chesenabia' naci_on c_heton', besyeyiljwlaže' bi da' yesag_üe' xya c_he Jesúsen' cont yesote'ne', perw bi besyeželden'. 56 Na' zan be_{ne}' gosone' diža' g_üenlaže' c_he Jesúsen', perw bi gosene' toz ca' yesene'. 57 Ba_le' gosezože'e na' bososbague'ne' xya c_hol, gosene':

58 —Neto' beneto' gwne': “Neda' yochin_ja' yodao' nga da' ben be_na_{ch}, na' šone žaze yeyona' yeto yodao' da' bi gon be_na_{ch}.”

59 Perw ne ca' ca' gosene' toz ca' yesene'.

60 Nach b_xoz blaon' gwzože'e ladjo yogo'l_ole' na' gw_nabde' Jesúsen':

—¿Bi choži'o xtižen'? ¿Bi dan' chosožie' le' xya?

61 Perw Jesúsen' bitw bi gwne', bitw boži'e xtižen'. Na' b_xoz blaon' da' yoble gw_nabde' le', gwne':

—¿Naco' le' Cristo ben' gwlej Diosen' cont nabi'e, na' Xi'in Dios ben' chonxencho?

62 Jesúsen' gože'ne':

—Le can' naca'. Na' le'ele neda' cate' ba chi'a šla'a li_{ch}a c_he Dios ben' nac la'zelag_üe be_{ne}' gwnabia', neda' naca' ben' gwse_le' golja' be_na_{ch}. Na' le'ele yetja' ladjo bejw dan' ze le'e yaban'.

63 Nach b_xoz blaon' gw_cheza' xa_lane' cont nacia' bi beque'e can' gwna Jesúsen', na' gwne':

—Noch no chyažje be_{ne}' co' da' ba_{li}. ⁶⁴ Le'e ba benele ch_{ne}' che Dios dan' že' ca', chon cuine' ca Dios. ¿Nacxe ža le'e?

Na' yog_{ue}' gosene' nape' do_{la}' na' cheya_{la}' gate'.

⁶⁵ Nach ba_{le}' gosezolag_{ue}' chosoži'ene' xene' na' bososeyjue' lag_{uen}' len to lache' na' gosot goseyine' le', na' goson_{le}' che' gose'ene':

—¡Gwnašc non' chot le'!

Na' be_{ne}' ca' chesape' yodao' blaon' gosot goseyine' le'.

Pedron' bi gw_{che}be' še nombi'e Jesúsen'

(Mt. 26:69-75; Lc. 22:56-62; Jn. 18:15-18, 25-29)

⁶⁶ Pedron' chi'e chyo'o che'e_{le}le, cate' bžin to no'ole g_{uen} žin che b_xoz blaon'. ⁶⁷ Na' cate' no'olen' ble'ede' le' chi'e choše'e cuine' cho'a yin', gw_{ne}'e le' na' gože'ne':

—Lencze le' naco' txen len Jesús be_{ne}' Nazaret.

⁶⁸ Perw Pedron' bi gw_{che}be', gw_{ne}':

—Bi nombi'ane', ne_{ca} ne_{zda}' bin' žo'.

Na' beyej Pedron' jayzie' cho'a puert na'le. Nach gw_{che}ž to jea. ⁶⁹ Na' no'ol g_{uen} žin_{na}' gw_{ne}'e le' da' yoble na' gože' be_{ne}' ca' nita' na':

—Benga naque' le_{gaque}' txen.

⁷⁰ Perw le' da' yoble bi gw_{che}be' še naque' txen len Jesúsen'. Na' gocze štit da' yoble be_{ne}' ca' nita' na' gose'e Pedron':

—Da' li_{cze}, le' naco' txen len le_{gaque}', le' naco' be_{ne}' Galilea, nachia' ch_{nio}' can' chesene be_{ne}' Galilea ca'.

⁷¹ Nach Pedron' ch_{op} šone ni'a gw_{ne}':

—Diosen' go_{ne}' neda' castigw še chon_{la}ža' žia' bi nombi'a bena'.

⁷² Na' cate la' gwchežte jean' da' gwchope. Nach jayze'e Pedron' can' gož Jesúsen' le': “Bina' cuež jean' chop ni'a cate' gac šon ni'a bi chebo' še nombi'o neda'.” Na' cate' jayze'ede' can' gož Jesúsen' le', na' gwcheže'.

15

Goseče'e Jesúsen' lao Pilato

(Mt. 27:1-2, 11-14; Lc. 23:1-5; Jn. 18:28-38)

¹ Ca gwyeni', b_xoz gwnabia' ca' besežague' len bene' gole blao ca' chesenabi'e nación cheton' na' len bene' ca' chososed chosolo'e dan' bzoj da' Moisés na' len yezica'chle bene' gwnabia' ca'. Na' bosocheje' Jesúsen' na' goseče'ene' jasesane'ne' lo na' Pilato ben' nac gobernador. ² Pilaton' gw_nabde'ne', gože'ne':

—¿Len' naco' rey che bene' Israel?

Jesúsen' boži'e xtižen', gwne':

—Can' gwnao'na', can' naquen.

³ Na' b_xoz gwnabia' ca' da' zan da' bosocuiše'ne'.

⁴ Nach Pilaton' da' yoble gw_nabde'ne', gože'ne':

—¿Bi choži'o xtiža'gaquen'? le da' zan da' chosocuiše' le'.

⁵ Perw Jesúsen' bitw bi gwne'. Na' Pilaton' bebande' che'.

Gosechogbi'en gat Jesúsen'

(Mt. 27:15-31; Lc. 23:13-25; Jn. 18:38-19:16)

⁶ Na' gota' costumbr, Pilaton' gwsane' to bene' de ližya caten' čala' lni pascw che neto' bene' Israel, con to bene' yesenab bene' gualaž cheton'. ⁷ To bene' lie' Barrabás na' len yexonj bene' gosot bene' cate' besyedabague' gobiern_na' zjayo'e lo' ližya len

nochle bene' güen da' mal. ⁸ Nach besežag bene' na' gosenabde' Pilaton' gwsane' to bene' con can' nac costumbr čhegaquen'. ⁹ Na' Pilaton' boži'e xtiža'gaquen' gwne':

—čChaclaže'le gwsana' rey čhe le'e nacle bene' Israel?

¹⁰ Gwne' ca' le gočbe'ede' dan' chesacxi'a bχoz gwnabi'a ca' Jesúsen', da'nan' bosodie' le' lo ne'e.

¹¹ Perw bχoz gwnabia' ca' bosota bosone' bene' ca' že' na' cont gosenabe' gwsane' Barrabás ben' de ližyan'. ¹² Nach Pilaton' gwnabde' legaque':

—čBixe gona' len ben' žale nac rey čhe le'e nacle bene' Israel?

¹³ Legaque' bososya'adie' bosyoži'e xtižen':

—čBde'e le'e yag cruz!

¹⁴ Pilaton' gože' legaque':

—čBixe da' xinj nonen'?

Nach legaque' da' yoble bososya'achgüe' gosene':

—čBde'e le'e yag cruz!

¹⁵ Nach Pilaton', cont bega'ane' güen len bene' ca', bsane' Barrabásen' can' gosenabe'. Na' bene' mandadw gosot goseyin soldadw čhe' ca' Jesúsen', nach bene' le' lo na'gaque' cont yosode'ene' le'e yag cruz.

¹⁶ Nach soldadw ca' goseče'ene' yeto latje dan' zoa chyo'o čhe liž bene' gwnabian', na' bosotobe' yogo' soldadw ca', zjanac zane'. ¹⁷ Gosečhize' Jesúsen' to lache' moradw, na' gosone' to corona de xis yeše' bosozoen' yičhjen'. ¹⁸ Na' gosezolagüe' chesonle' čhe', chesosye'e:

—čViva, rey čhe bene' Israel!

¹⁹ Na' bosozete' yičhjen' xis, bosožičene' xene', na' bosozoa xibe' gosone' ca' bene' chesonxen le'.

²⁰ Beyož goson_{le'} che', besyeyi_{ne'} lache' moradon' na' bosyoguae_{ne'} xacze'. Nach gose_{che'}ene' cont jasede'ene' _{le'e} yag cruz.

Bosode'ene' _{le'e} yag cruz

(Mt. 27:32-44; Lc. 23:26-43; Jn. 19:17-27)

²¹ Na' šlac zjan_{che'}ene' gan' yesote'ne' besyežague' to be_{ne'} yež Cirene le' Simón, xa Alejandro na' Rufo, za' zeze'e yi_{x'e'}, na' bosogüe'ene' yag cruz che Jesúsen'.

²² Gose_{che'}e Jesúsen' latje ga nzi' Gólgota, zeje dižan' Latje che Žit Yi_{chj} Be_{ne'} Guat. ²³ Na' gosone' vino da' n_{chix'e} to nechw da' nzi' mirra, perw Jesúsen' bi goclaže' ye'ejen'. ²⁴ Nach bosode'ene' _{le'e} yag cruzen'. Na' soldadw ca' gosone' rifa cate' besye_{le'e} xalana' Jesúsen' cont bla' bi besyeche_l to toe'.

²⁵ Cheda ga šezille caten' bosode'ene' _{le'e} yag cruz. ²⁶ Na' yi_{chj} yag cruzen' bosozoe' dan' bosozoje' choen' diža' bix_{chen'} gosote'ne'. Qui nyojen, žan: “Rey _{che} Be_{ne'} Israel.” ²⁷ Txen len Jesúsen' lecze bosode'e _{le'e} yag cruz ye_{chope} be_{ne'} gwban, toe' šla'a li_{cha}, na' yetoe' šla'a robes. ²⁸ Na' da' gosone' ca', goc ca' nyoj Xtiža' Diosen', žan: “Gosone'ne' ca be_{ne'} güen da' xi_{nj}.”

²⁹ Na' be_{ne'} gosede ga_{la'}ze gosezi'diže'ne', con chosota yi_{chje'} gosene':

—Le' gwnao' yo_{chij}o' yodaon' na' šone žaze yeyontion'. ³⁰ Bosla cuino' na' beyetj _{le'e} yag cruza'.

³¹ Lecze ca' b_{xoz} gwnabia' ca' na' be_{ne'} ca' bososed bosolo'e dan' bzoj da' Moisés gosezi'diže'ne', na' gose' lježe':

—Bosle' be_{ne}' yoble, perw bi chac yosla cuine'.
³² Le'echone' yeyetje' na'a le'e yag cruzen', nach šejle'cho naque' Cristo ben' gwlej Diosen' cont nabi'e chio' be_{ne}' Israel.

Na' lente be_{ne}' ca' bosoda'lene' le' le'e yag cruz ca' gosezi'diže'ne'.

Can' goc caten' got Jesúsēn'

(Mt. 27:45-56; Lc. 23:44-49; Jn. 19:28-30)

³³ Cate' bžin guagwbiž, doxen yežlion' goc cho_l, bžinte cheda šone. ³⁴ Na' ca hora' Jesúsēn' gwne' zižje gwne':

—Eloi, Eloi ĵlama sabactani? —zeje diža': Dios chia', Dios chia', ĵbixchen' ba gwlejiyichjo' neda'?

³⁵ Na' ba_l be_{ne}' ca' zjanita' na' gosende' na' gosene':

—Le gwzenag, cho_l güiže' da' Elías, ben' be' xtiža' Dios cani'.

³⁶ Nach to be_{ne}' ca' gwyejsese' na' bzažede' to esponja vino zichj na' bzoen' to lao xis tone nach jažiguen' cho'a Jesúsēn' cont xopen', na' gwne':

—Cuezcho, yešque güid Elíasēn' yeletje' le'.

³⁷ Nach Jesúsēn' bosye'e zižje, na' gote'. ³⁸ Na' lache' da' ze lo' yodao' blaon' bcheza' gacholen, gwza'te yichjen bžinte che'e_{le}. ³⁹ Na' xan soldadw ca' zie' lao Jesúsēn', na' cate' bende' can' bosye'en na' ble'ede' can' goten', gwne':

—Da' li le bengan' goc dogualje Xi'in Dios.

⁴⁰ Lecze ba_l no'ole zjanite' zito'le chesene'e. Na' len legaque' zjanita' María no'ole Magdala, na' Salomé, na' María xna' Jacobo be_{ne}' naše'te, na' lecze goque' xna' José. ⁴¹ No'ol qui gosa'ogüe' Jesúsēn' na' gosaclene' le' cate' chsed chlo'ede' be_{ne}' ca' že'

distritw Galilea. Na' yezanch no'ol zjanita' na', be_{ne}' ja'aclene' le' txen Jerusalén.

Bosocuaše' Jesúsen'

(Mt. 27:57-61; Lc. 23:50-56; Jn. 19:38-42)

⁴² Žana' goquen žan' bososi_{ni}'e par ža che Dios cate' bi de lsens yesone' žin. Na' cate' ba chxoax gwbiž, ⁴³ to be_{ne}' le' José, be_{ne}' ciuda Arimatea, beyaxjde' gwyeje' lao Pilaton' na' jay_nabe' cuerp che Jesúsen'. José goque' to be_{ne}' zaque' lao be_{ne}' ca' gosenabi'e nación Israel cheton', na' ba zoe' chbeze' batcan' solao _nabia' ben' se_{la}' Diosen'. ⁴⁴ Pilaton' bebande' dan' ba gote', na' goxe' xan soldadw ca' cont gw_nabde' le' še da' li ba gote'. ⁴⁵ Na' cate' xan soldadw ca' gože' le' le can' ba goc, Pilaton' bnežjue' latje beyoa' Josén' cuerp che Jesúsen'. ⁴⁶ Nach Josén' gwzi'e to lache' xen, beletje' cuerp che Jesúsen' na' bolažen' len. Na' la' jase_{lo}'ote' le' to lo' bloj da' nche'ene' le'e yej xen, na' b_{lo}le' to yej cho'a blojen' cont bseyjon len. ⁴⁷ Na' María no'ole Magdalan' len María x_na' Josén' besele'ede' gan' bosocuaše'nen'.

16

Beban Jesúsen' ladjo be_{ne}' guat ca'

(Mt. 28:1-10; Lc. 24:1-12; Jn. 20:1-10)

¹ Cate' gwde ža che Diosen', María no'ole Magdalan', María x_na' Jacobo, na' Salomé gosezi'e da' ch_{la}' zix cont šjaselo'en cuerp che Jesúsen'. ² Na' šezildao' ža dmigw besežine' cho'a ban', cate' za' ch_{la}' gwbiž. ³ Na' za' yesežine' gose' lježe':

—¿Noxe ca'a yej xen dan' da' cho'a blojen'?

4 Perw cate' besežine' na' gosene'e, besele'ede' yej xen dan' da' cho'a blojen' ba bga'an. 5 Nach goso'e lo' blojen', na' besele'ede' chi' to bene' xcuide' šla'a licha, nyaze' to lache' ton da' šiš. Na' besežebe'. 6 Na' bena' gože'ne':

—Bitw žeble. Cheyiljwle Jesús bene' Nazaret ben' bosode'e le'e yag cruz. Perw ba bebane'; notoch no nla' nga. Le na' gan' gosexoe'ne'. 7 Le šjaya'ac na' le ye' bene' ca' gosaque' le' txen, na' len Pedron', gwyobech Jesús en' yežine' Galilea cl el ca legaque'. Na' Galilean' na' yesele'ede'ne' can' gwnacze'.

8 Nach no'ol ca' chosyoxonjsese' besyeya'aque' cho'a blojen', le chesexiztite' besežebe'. Na' notno gose'e ca', le besexožde'.

*Jesúsen' blo'elagüe' María no'ole Magdala
(Jn. 20:11-18)*

9 Beyož beban Jesús en' ladjo bene' guat ca' šezildao' ža dmigw, Jesús en' blo'elagüe' da' nechw len María no'ole Magdalan', ben' bebeje' gaž da' xigüe' yo'o nyaze'. 10 Na' María nga jatixjue'ede' bene' ca' ba gosanita' len le'. Zjanita'yaše' na' chesebeže' cate' bžine'. 11 Na' cate' gosende' be'e diža' mban Jesús en' na' gosende' be'e dižan' can' ba ble'ede'ne', bi gosejle'e.

*Jesúsen' blo'elagüe' len chop bene' ca' gosaque' le'
txen
(Lc. 24:13-35)*

12 Beyož goc ca', chop bene' ca' gosaque' Jesús en' txen zjangüe'e nez yixe' cate' Jesús en' blo'elagüe' legaque', na' nža'le besele'ede'ne'. 13 Lecze legaque' ja'aque' jasedixjue'ede' bene' yezica'chle, perw neca gosejle'e chegaque'.

Da' bgon Jesúsen' yeson bene' ca' chsejnilaže'ne'
(Mt. 28:16-20; Lc. 24:36-49; Jn. 20:19-23)

¹⁴ Gwdena' bene' šnej ca' gwlej Jesúsen' cont zjanaque' le' txen zjachi'e cho'a mes chesagüe' cate' blo'elagüe' len legaque'. Na' gwdile' legaque' da' bi chsejnilaže' le' do yichj do laže' na' zjanaque' laždao' chach, le bi gosejle'e che bene' ca' besele'ede'ne' ba bebane' ladjo bene' guat ca'.

¹⁵ Na' gože' legaque':

—Le šja'ac doxen yežlio, na' le šjatixjue'e diža' güen chia' len yogo'lol bene'. ¹⁶ Bene' ca' yesejnilaže' neda' na' yesezoe' nis, gata' yela' mban chegaque' toli tocanē. Perw bene' bi chsejnilaže' neda', yesebiaye'e. ¹⁷ Na' bene' ca' chsejnilaže' neda', yesyega'anlene' da' qui: Yeso'e la' na' yesyebje' da' xigüe' yo'o nyaz bene'; yesenie' diža' cobe da' bi zjansede'; ¹⁸ na' še yesože' no bel znia, o še yese'eje' da' nac venen, bibi yesacde'; na' lecze yesexoa taque' yichj bene' chese'e na' yesyeyacde'.

Begüe Jesúsen' yaba
(Lc. 24:50-53)

¹⁹ Beyož bšaljlene' legaque', Xancho Jesúsen' begüe' yaba, na' gwchi'e cuit Diosen' šla'a licha. ²⁰ Na' bene' ca' zjanaque' le' txen besežaše' na' jasedixjue'ede' diža' güen che' doxen. Na' cuin Xancho Jesúsen' goclene' legaque' gosone' yela' guac cont gosejle' bene' le nac da' li dižan' goso'en. Da' na'zen' chzoja'.

**Diža' güen che ancho Jesucristo
New Testament in Zapotec, Zoogocho
(MX:zpq:Zapotec, Zoogocho)**

copyright © 1987 Wycliffe Bible Translators, Inc.

Language: Zapotec, Zoogocho

Translation by: Wycliffe Bible Translators, Inc.

Zapoteco, Zoogocho [zpq], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Zoogocho

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files
dated 29 Jan 2022
de7d40fb-3909-53d8-8bea-744cf1ce0e41